

ಇಬ್ರಿಯರಿಗೆ ಬರೆದ ಪತ್ರಿಕೆ ಪೌಲನೇ ಇಬ್ರಿಯವಾಳಾನ ಲೀಖ್ಯೋತೆ ಚಿಟ್ಟಿ ಮಾಲುಮ್ ಕರಾನು

ಇಬ್ರಿಯವಾಳಾನ ಲೀಖ್ಯೋತೆ ಪುಸ್ತಕ್ ಏಕ್ ಹುಮ್ಮಖ್ತ್ ದೇಸ್ತೆ ಚಿಟ್ಟಿಹುಯಿನ್ ಯೇಸು ಜೂನ ಒಪ್ಪಂದಾಮನು ಕೈಏಕ್ ಪ್ರವಾದನೆಖ್ತಾರು ಕಿಮ್ ಭರ್ಪೂರ್ ಕರ್ರೊಕರಿ ಬೋಲಾನು ವತಾಳಸ್. ಆ ಬೋಧನೇನಿ ರೂಪಾಮ ಲೀಖ್ತೆರುಸ್. ಅನಾಮ ಯೇಸು ಜೂನ ಒಪ್ಪಂದಾಮ ಪ್ರವಾದನೆ ಅಜ್ಜು ಯೆಹೂದಿ ಯಾಜಕಾನು ಕಾಮ್ ಕಿಮ್ ಪೂರ ಕರ್ರೊಕರಿ ಬೋಲಾನ ತಿನೀಖ್ತೊಲಿ ಘಣು ಜೂನ ಒಪ್ಪಂದಾನು ಸಾಬೂತ್‌ಲ್ಲಾ. ಆ ಹೈರುತೆ ಆ ಬಾರೇಮ ಅಲ್ಫಿನಿತರ ವತಾಳಸ್. ಅನಖ್ತಾಜೆ ಆ ಪುಸ್ತಕ್ ಯೆಹೂದಿ ವಿಶ್ವಾಸಿಯೇವ್ನ ಹುಮ್ಮಖ್ತ್ ದೇವಾನು ಪುಸ್ತಕ್ ಬೋಲಾವಸ್. ಯೇಸು ಕಿಮ್ ಧರ್ಮಶಾಸ್ತ್ರನ ಪೂರ ಕರ್ರೊ ಇನಖ್ತಾಜೇಥಿ ಯಾಜಕರ್ ಕೆದೇಬಿ ಜಿನು ಬಲಿ ದೈವಾನು ಜರೂರತ್ ಕೊಯ್ತಿಕರಿ ಇಬ್ರಿಯ ಪುಸ್ತಕ ವತಾಳಸ್ ಅಖ್ತಾ ಹಗಾಮ್ನಾಜೆ ಎಕ್ಸಹಲ್ಲ ಅಖ್ತಾಸ್ ಪಾಪ್ನಾಜೆ ಯೇಸು ಬಲಿಹುಯೊ. ದೇವ್‌ಮ ಭರೋಖ್ತೊ ರಾಖಾನ ಅಜ್ಜು ಇನಾಮಬಿ ಜಿನು ಭರೋಖ್ತೊ ರಾಖಾನ ಯೇಸು ಕ್ರಿಸ್ತನ ಪೀಠೆ ಜಾವ್ತುಕರಿ ಇಬ್ರಿಯ ಪುಸ್ತಕ ಹಮ್ಮೆನು ಅಪ್ಪ ಹಗಾಮ್ನು ವಿಶ್ವಾಸಿಖ್ತಾರನ ಜಿನುಕು ಹುಮ್ಮಖ್ತ್ ದೇಸ್ 12:2.

ಇಬ್ರಿಯ ಪುಸ್ತಕ್ ಕೋಣ್ ಲೀಖಿರಾಖ್ಯಸ್ ಕರಿ ಬೋಲಾನು ಕಿನಾಬಿ ಮಾಲುಮ್ ಕೊಯ್ತಿ ಕತೋಬಿ ಫಡಂತಿಖ್ತಾರು ಅಪೊಸ್ತಲ ಹುಯಿರ್ರೊತೆ ಪೌಲ, ಲೂಕ, ಬಾರ್ನಬಸ್ ರ್ವೇವ್ಣು ಕರಿ ಖೂಜ್ ದೇಸ್. ಆ ಲೀಖ್ತೆರುತ್ತೆ ವಖ್ತತ್ ಜಿನು ಮಾಲುಮ್‌ನಿತರ ಕೊಯ್ತಿ. ಕತೋಬಿ ಘಣೇಥಿ ಕ್ರಿಸ್ತ ಪೈದಾಖ್ತಾನ ವಾರ್ 70 ವರಖ್ತ್ ಅಗ್ಗಳಸ್ ಲಿಖ್ತೆರುತ್ತೆ ಕರಿ ವಿಶ್ವಾಸ್ ಕರಸ್. 70 ನು ವರಖ್ತಮ

ಯೆರೂಸಲೇಮ್ ಖ್ವಿಯೇರ್ನ್ ನಾಶ್‌ಕರಿ ರಾಖ್ಯುಧು. ಕತೋಬಿ ಲೀಖವಾಳನೆ ಆ ಚಿಟ್ಟೀಮ ಯೆರೂಸಲೇಮ್ ನಾಶ್ ಉಷೆಕರಿ ಬೋಲಾನು ಪರಕ್ತ ವಾತ್ ಬೋಲಸ್. ಇಬ್ರಿಯ ಪುಸ್ತಕ್ ರೋಮ್ ಖ್ವಿಯೇರ್‌ಮ ಲಿಖ್ಪಿರ್ನ್. 13:24 ಅಜು ಘಣೇಧಿ ಕೈಯೆಕ್ ಸಬೇಮ ಯೋ ಭಾಲಿರ್ನ್.

ಕಾಡಿದೇಖೊ

1. ಲೀಖವಾಳನೆ ದೇವ್ನು ಪ್ರವಾದಿಖ್ವಾರು ಅಜು ದೇವ್ವದೂತರ್‌ಧೀಬಿ ಊಚೊಕರಿ ವತಾಳಸ್. 1:1—4:13
2. ಇನಪಾರ್ ಯೊ ಯೆರೂಸಲೇಮ್‌ನ ದೇವಳ್ಳ ಸೇವೆ ಕರುಕರ್ತಧಾತೆ ಯಾಜಕವ್‌ಧೀಬಿ ಯೇಸು ಊಚೊ ಕರಿ ವತಾಳಿದೇಸ್. 4:14—7:28
3. ದೇವ್ನು ಮೋಶೇಧಿ ಇನ ಅದ್ವಿನ ಜೋಡೆ ಕರೈತೆ ಜೂನ ಒಪ್ಪಂದಾಧಿಬಿ ಯೇಸುನು ಸೇವೆನು ಕಾಮ್ ಊಚು ಹುಯಿರ್ನ್ ಕರಿ ವತಾಳಸ್ 8:1—10:31
4. ಯೇಸು ಅಖ್ವೀಸ್ ಪರಕ್ತ ಊಚೋ ಕರಿ ಬೋಲಿ ವತಾಳನ ವಾರ್ ಲೀಖವಾಳನೆ ಕೈಏಕ್ ಪ್ರಯೋಗ್‌ಧಿ ವಾಟ್‌ವತಾಳಿ ದೇಸ್ 10:32—13:17
5. ಖ್ವರ್ತಿಮ ಲೀಖವಾಳನೆ ಥೋಡು ಹುಮ್ಮಖ್ವ್ ದೈವಾನಿ ವಾತೆ ಬೋಲಿನ್ ಖ್ವಲಾಮ್ ಬೋಲೊಹುಯಿನ್ ಚಿಟ್ಟಿನ ಖತಮ್ ಕರಸ್ 13:18-25

ಛಿಯೇಧಿ ದೇವ್ನು ಸಂದೇಶ್

¹ ಅಗ್‌ಲ್ಯಹಗಾಮ್ ದೇವ್ನು ಪ್ರವಾದಿ ಖ್ವಾರಾಧಿ ಅಪ್ಪ ಗುರುಗುರಬ್‌ಲ್ಯನಿ ಜೋಡೆ ಕೆತ್ರೇಕ್ಕಿ ಪರಕ್ತ ಕೈಏಕ್ ಹಲ್ಲ ವಾತೆಬೋಲಿರಾಖ್ಯೋಸ್.

² ಕತೋಬಿ ಆ ಖ್ವರ್ತಿನೊ ದನ್ತು ಯೊ ಇನ ಛಿಯ್ತಾಧಿ ಅಪ್ಪ ಜೋಡೆ ವಾತೆ ಬೋಲೊ. ದೇವ್ನು ಇನ ಛಿಯ್ತಾಧಿ ಖ್ವಾರ ಜಗತ್‌ನಾಸ್ ಉಬ್‌ಜೈನ್ ಹರೇಕ್‌ಪರ್ ಇನಾಸ್ ವಾರಿಸ್ ಕರೈನ್.

³ ಯೋಸ್ ದೇವ್ನು ಮಹಿಮೆನು ಉಚಾಖ್ವೆಬಿ, ದೇವ್ನು ಪ್ರತಿರೂಪ್‌ಬಿ, ಇನಿ ವಚನ್ ಶಕಧಿ ಅಖ್ವಾಸ್ನ ಆಧಾರ್ ಹುಯಿನ್ ಯೋಸ್

ಅದಮ್‌ಜಮಾನನಿ ಪಾಪ್ಪ ಶುದ್ಧೀಕರಿನ್ ಸೋರ್ಗಾಮ ಮಹಾನ್ ದೇವ್ನ್
ಖಾವಿಬಾಙ್ಗುಮ ಬೇಶಿಗಯೊ.

ದೇವ್ನ್ ಛಿಯ್ಯಾನಿ ಭಡ್‌ಪಣ್

4 ಹೈರುತೆ ದೇವ್‌ದೂತರ್‌ಧೀಬಿ ಮಹಾನ್ ಊಙ್ಗೊ ಹುಯಿನ್; ಇನ
ದಿದೋತೆ ನಾಮ್ ದೇವ್‌ದೂತರ್‌ಧೀಬಿ ಮಹಾನ್ ಹುಯಿರ್‌ಪ್ಪಸ್.

5 ಶನಕತೊ, ದೇವ್ ಇನ ದೇವ್‌ದೂತರ್‌ಮ ಕಿನಾತೋಬಿ,
“ತೂ ಮಾರೊ ಛಿಯ್ಯೊ;

ಆಝ್ ಮೇಸ್ ತಾರೊ ಬಾ ಹುಯಿರ್‌ಪ್ಪಿನ್

“ಮೇ ಇನೊ ಬಾ ಹುಯಿರ್‌ಪ್ಪಿನ್,

ಯೋ ಮಾರೊ ಛಿಯ್ಯೊ ಹುಯಿರ್‌ಪ್ಪಿಶೆ.” ಕರಿ

ಬೋಲಿರಾಪ್ಪೊಕೊಯ್ತಿ.

6 “ಆ ಕಾಹೆತೆ ದೇವ್ ಇನ ಪೈಲೋಟ ಛಿಯ್ಯಾನ ಧರ್ತಿಪರ್ ಪಾಱ್ತು
ಮೋಕ್ಲಾನಿ ವಖ್ವೆತೆ,
ದೇವ್ನ್ ದೂತರ್‌ಪ್ಪಾರು ಇನ ಆರಾದನೆ ಕರ್ನುಕರಿ ಹುಕುಮ್
ಕರಿರಾಪ್ಪೊಸ್”.

7 ಕತೋಬಿ ದೇವ್ನ್ ದೂತರ್‌ನಿ ಬಾರೇಮ,

“ದೇವ್ ಇನ ದೂತರ್‌ನ್ ವಹಿರಾನಿ ಘೋಣಿಬಿ,

ಅಙ್ಗು ಇನ ಸೇವಕ್‌ಪ್ಪಾರನ ಆಗ್‌ನಿ ಝಲಪಟ್‌ನಿತರಾಬಿ
ಕರೀಶ್‌ಕರಿ ಬೋಲಿರಾಪ್ಪೊಸ್.”

8 ಕತೋಬಿ ಛಿಯ್ಯಾನಿ ಬಾರೇಮ ಅಮ್ ಬೋಲೊ;

“ದೇವ್ ತಾರು ಸಿಂಹಾಸನ್ ಜಗ್‌ಜಮಾನಮಾಬಿ ರಪ್ಪಿಶೆ.

ನೀತಿನ್ ಡಂಡೊಸ್ ತಾರು ರಾಙ್ಗನ್ ಡಂಡೊ ಹುಯಿರ್‌ಪ್ಪಸ್.

9 ತೂ ಬರೋಬರ್‌ನ ಪ್ಯಾರ್‌ಕರ್‌ಪ್ಪೊ ಅಙ್ಗು ಗಲತ್‌ನ ಝಿಟ್ಕಾರ್‌ಪ್ಪೊ

ಇನಖ್ವಾಜೇಧಿ ದೇವ್ ತಾರೊ ದೇವಸ್. ತುನ ತಾರ ಜೋಡೆ
ರಪ್ಪಾಳಧಿಬಿ

- ಶಂತೋಖ್ವನ ಜಾಖ್ವತ್ ತೇಲ್‌ಥಿ ಅಬಿಷೇಕ್ ಕರಿರಾಖ್ಯೊಸ್
 10 ಇನೆ ಅಮ್‌ಬಿ ಬೋಲೊ;
 “ಪ್ರಭು ತೂ ಶುರುವಾತ್ಮ ಜಮೀನ್ಸ್ ಹದಿಪಾಯ ನಾಖ್ಯೊ
 ಅಜ್ಜು ತಾರ ಹಾತೇಮ್ಮಿ ಆಬ್‌ನ ತುನೆ ಬಣಾಯೊ,
 11 ಯೋಖ್ವಾರ್ರು ದೆಖಾವ ಕೊಂತೆ ಹುಯಿಜ್ಜಾಶೆ ಕತೋಬಿ ತು ಕೆದೇಬಿ
 ರ್ಲೇಶ್.
 ಯೊ ಜಿನಖ್ವಾಅಮ್ಮಿ ಲುಂಗ್ಡನಿತರ ಗಳಿಜಾಶೆ.
 12 ತು ಯೊ ಅಖ್ವಾನ ಝಗ್ಗಾನಿತರ ಬಿಡ್ಕಿಕರಿಷ್,
 ಅಜ್ಜು ಯೊ ಪೇರ್ವಾಖ್ವನಿತರ ಬದ್ಲಿಜಾಶೆ.
 ಕತೋಬಿ ಕದೆಕದೇಬಿ ಬದಲಿಶ್ ಕೊಯ್ವಿ.
 ಅಜ್ಜು ತಾರ ಉಂಬರ್ವ್ ಖರ್ತಿಕ್ಸ್ ಕೊಯ್ವಿ ಕರಿ ಬೋಲಾಸ್.
 13 ಕತೋಬಿ ಖೆವ ದೇವ್‌ದೂತರ್‌ನತೋಬಿ ದೇವ್ವೆ
 ಮೇ ತಾರ ದುಶ್‌ಮನ್ನ ತಾರ ಗೋಡಾನ ರಚ್ಚಾಕನ ನಾಖತೋಡಿ
 ತು ಮಾರಿ ಖಾವಿ ಬಾಜ್ಜೂಮ ಬೆಲೋರೆ ಕರಿ ಕದೆತೋಬಿ
 ಬೋಲೊಧೋಕಿ ಶು?
 14 ಆ ಅಮ್ಮಿ ದೇವ್‌ದೂತರ್ ರಕ್ಷಣೆನು ಹಕ್ಕಲೀರಾಕ್ಲತೆ ಇವ್ವಾಅಖ್ವಾನು
 ಸೇವೆನಖ್ವಾಜೆ ಮೋಕ್ಲಾಯುತೆ ಸೇವೆನು ಆತ್ಮ ಕಾಹೇಕಿಶು.

2

ಮಹಾನ್ ರಕ್ಷಣೆ

- 1 ಇನಖ್ವಾಜೆ ಅಪ್ಪೆ ಖ್ವಮ್‌ಜ್ಯಾತೆ ಬಾರೇನು ನಾ ಛುಕಿಭಾವ್ವಾತೆ ಯೊ
 ಅಖ್ವಾನ ಜಾಖ್ವತ್ ಧ್ಯಾನ್ ದ್ಯಾವಾಳ ಹುಯಿರ್ಲೇಣು.
 2 ಶನಕತೊ ದೇವ್‌ದೂತರ್‌ಥಿ ಅಪ್ಪಗುರುಗುರಬ್‌ಲ್ಯನ ದೆವೈರ್ಲೊಸ್ತೆ
 ಸಂದೇಶ್ ಖ್ವಾಘುಧು, ಇನಾಬಿ ಭಡೆನ್ ಕರಾನು ಹರೇಕ್ ಗಲ್ಲಿ ಅಜ್ಜು
 ಕೋಣ್ ವಿಧೇಯ ಕೊಹುಯುನಿಕಿ ನತರ್ ವಿಧೇಯ ಹುಯಿನ್
 ಬರಬರ್ಲಿ ನಿಶತ್ ಲಿದು.

3 ಅಪ್ಪ ಖ್ವಾಮ್ವೆ ಮ್ವೇಲಿರಾಖೊತೆ ಅಥಾನಿ ಮಹಾನ್ ರಕ್ಷಣೆನ ಅಪ್ಪೆ ಕರ್ಮಯ್ಯಕಾಡ್ಯತೊ, ಛುಕಿಭಾವನುತೋಬಿ ಕಿಮ್? ಆ ಹೈರುತೆ ಪ್ರಭುಧಿ ಪಹಿಲೆ ಬೋಲಾಯು ಅಜ್ಜು ಇನೇಧಿ ಖ್ವಮ್ಜ್ಯಥಾತೆ ಅನ ಹಮೂನ ಘಟ್ಕರಾಯು.

4 ಖ್ವಣೇದ್‌ನು ಕಾಮ್‌ಧೀಬಿ, ಅದ್ಭುತ್‌ಕಾಮ್ ಖ್ವಾರಧಿಬಿ, ಕೈಯೇಕ್ ಥರಾನು ಮಹಾನ್ ಕಾಮ್‌ಧೀಬಿ ಅಜ್ಜು ಇನಿ ಸೋಚ್‌ನಿತರ ಪವಿತ್ರಾತ್ಮನು ವರಾನ ವಾಟಪಾಡಿ ದೈವಾಧಿ ದೇವ್ವೇಸ್ ಇನ ವತಾಳಿಲಿದೊ.

ಅಪ್ಪುನ ರಕ್ಷಣೆಮ ಚಲಾವವಾಳೊ

5 ಅಪ್ಪೆ ಬೋಲುಕರೇಸ್ತೆ ಖ್ವಾಮ್ವೆ ಆವ್‌ಶೇತೆ ನವುಜಗತ್ವ ಚಲಾವನ ದೇವ್ವೆ ಇನ ದೂತರ್ನ್ ಕಬ್‌ಜಾಮ ದಿದೊ ಕೊಯ್ನಿ.

6 ಕತೋಬಿ ಪವಿತ್ರ ದಪ್ಪರ್‌ಮ ಕಿಜ್ಜಾಕಿ ಏಕ್ ಝಗೊ ಅಮ್ ಬೋಲಿರಾಖ್ಯುಸ್, ಅದ್ಮಿಕೆವ್ವೋಖ್ವೊ ಇನ ತೂ ಶನ ಯಾದ್ ಕರಾಸ್?

ಅದ್ಮಿಕೆಥ್ರಾನೊವಾಳೊ, ಇನಾಮ ಶನ ನಿಘ್ಕರಾಕ್ಟು?

7 ತೂ ಅದ್ಮಿನ ದೇವ್‌ದೂತರ್‌ಧಿ ಜರಸ್ ಕಮ್‌ಕರೀನ್ ಬಣೈರಾಖ್ಯೊಸ್ಸಿ ಮಹಿಮೆಬಿ ಮರ್ಯಾದಿನ ಇನ ಕಿರೀಟ್ ಕರೀನ್ ದೀರಾಖ್ಯೊಸ್.

8 ಅಜ್ಜು ಅಖ್ವಾಸ್ನ ಇನ ಗೋಡಾನ ಹೇಟ್ ನಾಖಿನ್ ಇನ ಕಬ್‌ಜಾಮ ಕರಿರಾಖ್ಯೊಸ್ಸಿ.

“ಇನೆ ಅಖ್ವಾಸ್ನ ಅದಮ್ಲಮಾನನ ಹೇಟ್ ಕರಿರಾಖ್ಯೊಸ್‌ಕರಿ” ಬೋಲಾಮ ಇನ ಏಕ್‌ತೋಬಿ ಹೇಟುಕೊಂತೆ ಮ್ವೇಲ್ಯೊಕೊಯ್ನಿಕರಿ ಬೋಲಾನಿತರಹುಯು. ಕತೋಬಿ ಅಖ್ವಾಬಿ ಇನ ಹೇಟ್ ಛಾಕರಿ ಅಪ್ಪೆ ಬಿಜ್ಜೂಬಿ ಕೊದೇಖ್ಯಾನಿ.

9 ಕತೋಬಿ ದೇವ್‌ದೂತರ್‌ಧಿ ಜರಸ್ ಕಮ್ ಬಣೈರಾಖ್ಯೊಸ್ತೆ ಯೇಸು ಖ್ವತಾಪ್ಪಿನಲೀನ್ ಮರ್ಯೊತೆ ಇನಖ್ವಾಜೆ ಮಹಿಮೆನಾಬಿ ಮರ್ಯಾದಿನ

ಕಿರೀಟ್ ಕರೀನ್ ಫಾಲಿರಾಖನು ಅಪ್ಪೆ ದೇಖಿಸ್. ಇನಖ್ವಾಜೀಸ್ ದೇವ್ನ ವಾರ್ಖ್ವೇಡಿ ಯೇಸುನೆ ಹರೇಕ್‌ನಖ್ವಾಜೆ ಮರಣ್ಣಿ ಖ್ತಾಪ್ಪಿನ ಲಿದೊ.

10 ಹರೇಕ್‌ಬಿ ಕಿನಖ್ವಾಜೆ ಕಿನೇಡಿ ಬಣ್ಣುಕಿ. ಯೊ ಘಣು ಭಣು ಛಿಯ್ಯಾವ್‌ನ ಮಹಿಮೆನ ಮಳಾವನಖ್ವಾಜೆ; ಇವ್ಣ ಬಚ್ಚಾಡವಾಳ ಮೋಟಾನ ಖ್ತಾವಡಿ ರಕ್ಷಣೆಲ್ಯವಾನು ಬರಬರಸ್.

11 ಶನಕತೊ ಪರಿಶುದ್ಧ ಕರಾವಳನಾಬಿ ಪರಿಶುದ್ಧ ರ್ವಾವಳನಾಬಿ ಯೋಸ್ ಬಾ. ಅನಖ್ವಾಜೆಸ್ ಇವ್ಣುನ ಪರಿಶುದ್ಧ ಕರಾವಾಳೊ ಇವ್ಣುನ ಭೈಯೇ ಭೇನೆಕರಿ ಬೋಲಾನ ಖ್ಹರ್ಮಾಯೊ ಕೊಯ್ನಿ.

12 ಯೊ ಬೋಲಸ್ ತಾರು ನಾಮ್ ಮಹಿಮೆನ ಮೆ ಮಾರ ಭೈಯೇ ಭೇನೆವ್‌ನ ಬೋಲಿದೆವುಸ್. ಸಬೆನ ಇಚ್ಛಮ ತುನ ಸ್ತುತಿನ್ ಗೀದ್ ಬೋಲಿಶ್ ಕರೀಬಿ,

13 ಮೇ ಪಾಟ್ಲೊ ಫರಿನ್ ದೇವ್‌ಪರ್ ಭರೋಖ್ವೊ ಕರಿರಾಖವಾಳೊಕರಿಬಿ, ಹಂದೇಖೊ ಮೇಬಿ ಅಜ್ಜು ದೇವ್ ಮನ ದಿರಾಖ್ವೊಸ್ತೆ ಲಡ್ಕಾವ್‌ಬಿ ಛಿಯ್ಯೆಕರಿಬಿ ಬೋಲಾಸ್.

14 ಅತ್ರೇಸ್ ಕಾಹೆತೆ ಲಡ್ಕಾವ್‌ಖ್ವಾರು ಲ್ಹೊಯಿಡಿಬಿ ಬೋಟಿಡಿ ಹುಯಿರುತೆ ಇಮ್ಮಸ್ ಯೇಸು ಜಿನು ಇವ್ಣಿನಿರಸ್ ಲ್ಹೊಯಿಬಿ ಬೋಟಿಡಿಹುಯೊ. ಇನಿ ಮರಣ್‌ಥೀಸ್ ಮರಣ್ಣಿ ಅಧಿಕಾರ್ ಲೀರಾಖವಾಳ ಶೈತಾನ್ ಮಟಾಯೊ.

15 ಅಜ್ಜು ಮರಣ್ಣಿ ಡರ್‌ಥಿ ಇವ್ಣು ಬಚಿರ್ದವಾನು ಹಗಾಮ್ ಅಖ್ಪು ಗುಲಾಮ್ ರ್ವಾವಳನ ಛೋಡಾಯೊ.

16 ಖ್ವಾಚಮಾಬಿ ಯೋ ದೇವ್‌ದೂತರ್ನ್ ಮದತ್ ಕರಾನಖ್ವಾಜೆ ಕಾಹೆ ಅಬ್ರಹಾಮ್‌ನಿ ಪಿಳ್ಳಿನ ಮದತ್‌ಕರಾನಖ್ವಾಜೆ ಆಯೊ.

17 ಇನಖ್ವಾಜೆ ಯೊ ಹರೇಕ್ ವಿಚಾರ್‌ಮಾಬಿ ಇನ ಭೈಯೇ ಭೇನೆನ ತಕ್ಕೆರ್ದವಾನು ಭರೂರತ್ ಥು. ಅಮ್ ಇನೆ ಅದ್ಮಿಯೇವ್‌ನು ಪಾಪ್ ಅಖ್ಪು ಕ್ಷಮಾಪಣ್ ಕರಾನಖ್ವಾಜೆ ದೇವ್ ಕಾಮ್ ಗೋರ್‌ಬಿ ವಿಶ್ವಾಸ್‌ಬಿ ಹುಯಿರ್ದವಾಳೊ ಮಹಾಯಾಜಕ್ ಹುಯೊ.

18 ಯೊ ಹಮ್ಮೆ ಶೋದನೆ ಪಡವಾಳನ ಮದತ್ ಕರೆಜಾಯ್. ಶನಕತೊ ಯೋಸ್ ಶೋದನೆಮ ಪಡಿರ್ದೊಸ್, ಅಜ್ಜು ಖ್ವತಾಪ್ಪಿ ಲೀಲ್ಯಾವಾಳೊ ಹುಯಿರ್ದೊಸ್.

3

ಮೋಶೇಧೀಬಿ ಯೇಸು ಮಹಾನ್

1 ಇನಖ್ವಾಜೆ ಕ್ರಿಸ್ತಮ ಪರಿಶುದ್ಧರ್ದವಾಳ ಭೈಯೇ ಭೇನೆವೊ ಸೊರ್ಗನು ಬುಲಾವ್ವಿಮ ಭಾಗ್ ಲೀರಾವವಾಳವೊ, ಅಪ್ಪೆ ಮಾನಿರಾವ್ವಿತಿ ಅಪೊಸ್ತಲಬಿ ಅಜ್ಜು ಮಹಾಯಾಜಕ್‌ಬಿ ಹುಯಿರ್ದೊತ್ತೆ ಯೇಸುನಿ ಬಾರೇಮ ಧ್ಯಾನ್ ಲಗಾಡನ್ ಸೋಚೊ.

2 ಮೋಶೆ ದೇವ್ವ ಘರಮ ವಿಶ್ವಾಸ್‌ವಾಳೊ ಹುಯಿರ್ದೊಡೊತ್ತೆ ತಿಮ್ಮಸ್, ಯೊ ಚೂಣಿರಾವವಾಳನ ವಿಶ್ವಾಸ್‌ವಾಳೊ ಹುಯಿರ್ದೊಡೊ.

3 ಘರಧೀಬಿ ಘರಭಾಂದ್ಯೊತ್ತೆ ಇನ ಜಾಖ್ವತ್ ಮರ್ಯಾದಿ ರ್ದೊಸ್ತೆ ಖ್ವಾಜೆ ಮೋಶೇಧೀಬಿ ಯೇಸುಸ್ ಜಾಖ್ವತ್ ಮರ್ಯಾದಿನ ಯೋಗ್ಯಕರಿ ಚೂಣ್ಯರ್ದೊಸ್.

4 ಅಖ್ವಾಸ್ ಘರನ ಕೋಣಸ್ಕಿ ಏಕ್ಲಣೊ ಉಬ್‌ಜೈರಾವ್ವೊಸ್. ಕತೋಬಿ ಹರೇಕ್ಷ ಉಬ್‌ಜೈರಾವ್ವೊತ್ತೆ ದೇವಸ್.

5 ಮೋಶೆ ದೇವ್ವ ಘರಮ ವಿಶ್ವಾಸ್‌ನೊ ಸೇವಕ್ ಹುಯಿರ್ದೊಡೊ. ಇನೆ ಖ್ವಾಮ್ಚೆ ಬೋಲಾವನಿ ಬಾರೇಮ ಸಾಕ್ಷಿ ಹುಯಿರ್ದೊಡೊ.

6 ಕತೋಬಿ ಕ್ರಿಸ್ತತೋಬಿ ಛಿಯೊಹುಯಿನ್ ದೇವ್ವ ಘರಪರ್ ಹಕ್‌ವಾಳೊ ಹುಯಿರ್ದೊಸ್. ಅಪ್ಪೆ ಹಿಮ್ಮತ್‌ಬಿನ್ ಭರೋಖ್ವಾಡಿಬಿ ಖ್ವರ್ತಿಲಗು ಘಟ್‌ಧಿ ಧರಿರಾವವಾಳ ಹುಯಾತೊ ಅಪ್ಪೆಸ್ ದೇವ್ವ ಘರ ಹುಯಿರ್ದೊಪು.

ದೇವ್ವ ಅದ್ವಿಯೇವ್‌ನ ಛಾತೆ ಅರಾಮ್

7 ಇಮ್ಮಸ್ ಪವಿತ್ರಾತ್ಮ ಬೋಲಾನಿ ಪರಕ್ಮತುಮೆ ಆ ದನ್ ದೇವ್ವ ಗಳಾನ ಕಾನ್ ಲಗಾಡವಾಳ ರ್ದಯಾತೊ,

8 ತುಮಾರ ಗುರುಗುರುಬಾಲ್ಯ ಜಂಗಳಾಂಮ ದೇವ್ವ ತರೀಪ್ಪ ಕರೊತ್ತೆ ವಖ್ತಾಂಮ ಇವ್ಣೆ ವಿರೋದ್ ಕರೊತ್ತ್ ಇವ್ಣಿಂತ್ರ ಕರಣ್ ದಿಲ್‌ವಾಳ ನಕೊ ಹುವೊ.

9 ತುಮಾರು ಶಾಣುಖ್ವಾರು ಗಬ್ಬರ್‌ಧಿ ಮನ ತರೀಪ್ಪ ಕರೀನ್ ಭಾಳಿಖ್ವಾರ್ ವರಖ್ವಾರ ಕಾಮ್‌ಖ್ವಾರು ದೇಖ್ವಾರ್.

10 ಇನಖ್ವಾಜೆ 'ಮೆ ಆ ಪಿಳ್ಳಿವಾಳಪರ್ ಘಣು ಖೀಜ್ ಖೈನ್ ಇವ್ಣೆ ಕೆದೇಬಿ ದಿಲ್ ಬದ್‌ಲೈಲ್ಯವಾಳುಬಿ ಇವ್ಣೆ ಮಾರು ಮಾರಗ್‌ನ ಕೊ ಪರಖ್‌ಷೇನಿ' ಕರಿ ಮೇ ಬೋಲೊ.

11 ಅಮ್ ರ್ವಾಪರ್ ಇವ್ಣೆ ಮಾರಿ ಆರಾಮ್ನಿ ಝಗೋಮ ಮಳ್‌ಶೇಸ್‌ಕೊಯ್ತಿ" ಕರಿ ಖಿಜೈನ್ ಆಣ್‌ಕರೊ.

12 ಮಾರ ಭೈಯೇ ಭೇನೇವೊ ತುಮಾರಮ ಖರಾಬ್ ರ್ವೊ ಜಿವೊ ಜಾನ್ನೊ ದೇವ್ವ ಮ್ಹೇಲಾನು ಅವಿಶ್ವಾಸ್‌ನೊ ದಿಲ್ ಕಿನಾಮಬಿ ನಾರ್‌ವೊತ್ತೆ ಹೊಷಾರ್‌ಧಿ ದೇಖಲೆವೊ.

13 ತುಮಾರಮ ಏಕ್‌ಜಣುಬಿ ಪಾಪ್‌ಮ ಖ್ವಾಡಿನ್ ರಗೈ ನಾಜಾವುತ್ತಿ, ಹಮ್ಮೇಬಿ ಕದೇಬಿ ಬುಲೈಲೆಯಿತಿ ವೇಳ್ ಛಾತಿ ತದೇಸ್, ಹರೇಕ್‌ದನಾಬಿ ಏಕ್‌ಧಿ ಏಕ್‌ಜಣು ಹುಮ್ಮಖ್ವಾದೆವೊ.

14 ಶನಕತೊ ಪಹಿಲೆಥೂ ಖರ್ತಿಲಗೂಬಿ ಭರೋಖ್ವಾನ ಘಟ್‌ರಾಖ್ಯಾತೊ ಅಪ್ಪೆ ಕ್ರಿಸ್ತನ ಗಳ್‌ಜೋಡ್ ಭಾಗ್‌ಲ್ಯವಾಳ ಹುಯಿರೊಪ್ಪು.

15 ಪವಿತ್ರ ದಪ್ತರ್‌ಮ ಅಮ್ ಬೋಲಸ್, "ತುಮೆ ಆ ವೇಳ್ ದೇವ್ವ ಗಳಾನ ಖ್ವಮಜ್‌ತಾ ಉಷೇತೊ ತುಮಾರ ಗುರುಗುರುಬಾಲ್ಯ ಇವ್ಣೆ ಘಬ್ಬರ್ ಕರಾನಿಘೋಣಿ ತುಮಾರ ದಿಲ್‌ನಾಬಿ ಕರಣ್ ನಕೊ ಕರಿಲೆವೊ.

16 ದೇವ್ವ ಅವಾಜ್ನ ಖ್ವಮ್‌ಜಿನ್ ವಿರೋದ್ ಕರೊತ್ತ್ ಕೋಣ್? ಮೋಶೇಧಿ ಈಜಿಫ್‌ಥು ಬುಲೈರ್ದಯಹುಯ ಕಾಹೆಕಿಶು?

17 ಅಜ್ಜು ದೇವ್ಣೆ ಭಾಳಿಖ್ವಾರ್ ವರಖ್ವಾರ್ ಕಿನಾಪರ್ ಜಾಖ್ವತ್ ವಿಜಾಯೊ? ಪಾಪ್ ಕರಾಪರ್ ಇವ್ಣು ಮುದುರ್‌ಖ್ವಾರು ಜಂಗಳಾಂಮಾಸ್ ಪಡಿಗಯು

ಕೊಯ್ತಿಸಿಶು?

18 “ಮಾರು ಆರಾಮ್ತು ತುಮೆ ಮಳೆಶೂಸ್ ಕೊಯ್ತಿಸಿ ಕಿನಿ ಬಾರೇಮ ಇನೆ ಆಣ್ ಕರೈತೆ? ಯೊ ಗಬ್ಬರ್‌ಕರೈತೆ ಇನಖ್ವಾಜೇಸ್ ಕಾಹೆಕಿಶು?

19 ಅನಖ್ವಾಜೇಸ್ ಇವ್ವೆ ಅರಾಮ್ತು ಮಳಾನ ಕೊಹುಯುನಿತೆ ಗಯೂತೆ ಇವ್ವಿ ಅವಿಶ್ವಾಸ್‌ಥೀಸ್ ಕರಿ ಅವ್ವೆ ದೇಖಿಸ್.

4

1 ಅಮರ್ತ್ವಾಪರ್, ದೇವ್ನಿ ಆರಾಮ್ತು ಮಳೆಜಾಯ್ ಕರಿ ಛಾತೆ ವಾಗ್ದಾನ್ ಬಿಜೂಬಿ ಇನಖ್ವಾಜೆ ತುಮಾರಮ ಕೋಣೆಬಿ ಇನಾಮ ಛುಕಿನಾಜಾವ್ವತೆ ಅವ್ವೆ ಡರ್ ಭಕ್ತಿಧಿ ರೈಯೆ.

2 ಇಸ್ರಯೇಲ್‌ವಾಳಾನ ಸುವಾರ್ತೆ ಬೋಲಾಯುತೆ ತಿಮ್ ಹಮುನಾಬಿ ಬೋಲಾಯು. ಕತೋಬಿ ಯೊ ಹಗಾಮ್ತು ಇವ್ವೆ ಭರೋಖ್ವಾಧಿ ಖ್ವಮ್‌ಜ್ಯುಕೊಂತೆ ಇನಖ್ವಾಜೆ ಇವ್ವುನ ಫಾಯಿದೊ ಕೊಹುಯುನಿ.

3 ಹಮ್ಕೆ ವಿಶ್ವಾಸ್ ಕರಾವಾಳ ಅವ್ವೆಸ್ ಯೊ ಅರಾಮ್‌ನಿ ಝಗೋಮ ಮಳಾವಾಳ ಹುಯಿರೈಸ್. ಶನಕತೊ ಜಗತ್ ಪಹಿಲೇಥು ಇನು ಉಬ್‌ಜಾವ್ವಿನ ಕಾಮ್‌ಖ್ವಾರು ಖತಮ್ ಹುಯ್ಗತೋಬಿ ‘ಇವ್ವೆ ಮಾರಿ ಆರಾಮ್ತು ಝಗೋಮ ಮಳೆಶೇಸ್‌ಕೊಯ್ತಿಸಿ ಕರಿ ಮೆ ಇರಾದೇಥಿ ಆಣ್‌ಲಿದೊ’ ಕರಿ ಬೋಲಿರಾಖ್ತೊಸ್ಸಿ.

4 ಕಿಜ್ಜಾಕಿ ಏಕ್ ಬಾಜು ಉಬ್‌ಜಾವ್ವಿನ ಖ್ವಾತ್ತ್ ದನ್ನಬಾರೇಮ, ದೇವ್ವೆ ಇನು ಕಾಮ್‌ಖ್ವಾರು ಖತಮ್ ಕರಿನ್, ಖ್ವಾತ್ತ್ ದನ್ಮ ಅರಾಮ್ ಕರೈಕರಿ ಲಿಖ್ತೆರೈಸ್.

5 “ಅವ್ವೆ ಮಾರಿ ಆರಾಮ್ತು ಝಗೋಮ ಮಳೆಶೇಸ್‌ಕೊಯ್ತಿಸಿ ಕರಿ ಏಕ್‌ಭಾಗ್‌ಮ ಯೊ ಬಿಜುಪಾಚ್ಚು ಬೋಲಿರಾಖ್ತೊಸ್.

6 ಪಹಿಲೆ ಸುವಾರ್ತೆ ಖ್ವಮ್‌ಜ್ಯೂಕಿ ಇವ್ಣೆ ಆ ಅರಾಮ್ ಕೋಲಿದುನಿ ಶನಕತೊ ಇವ್ಣೆ ಇನ ಅವಿಧೇಯ ಹುಯಿರ್ದು. ಇನಖ್ವಾಜೆ ದೇವ್ವ ಆರಾಮ್ ಲೀಲ್ಯಾವನ ಬಿಜಾನ ಹುಕುಮ್ ದಿದೊ.

7 ಬಿಜುಪಾಟ್ಲೊ ಘಣಾವರಖ್ವನ ಬಾದ್ಮ ಯೋ ದಾವೀದ್‌ಧಿ 'ಆಜ್‌ನೊ ದನ್' ಕರಿ ಬಿಜೋದನ್ನ ಬೋಲಿದಿದೊ, ಕಿಮ್‌ಕತೊ ತುಮೆ ಆ ವಖ್ವತ್ ದೇವ್ವ ಗಳಾನ ಕಾನ್ ಲಗಾಡವಾಳ ರ್ಹಯಾತೊ ತುಮಾರ ದಿಲ್ವ ಕರಣ್ ನಕೊ ಕರಿಲೆವೊ! ಕರಿ ಬೋಲಸ್.

8 ಯೆಹೋಶುವನೆ ಯೋ ಅದ್ಮಿವೋನ ಯೋ ಅರಾಮ್‌ನ ಮಹಿ ಲೀಗಯೊಹೊತ್ತೊ, ದೇವ್‌ಬಿಜೇಕ್ ದನ್ನಿಬಾರೇಮ ಪಾಲ್ಲ ಬೋಲ್ಯೊಹೊತ್ತೆಕೊಯ್ನಿ.

9 ಇನಖ್ವಾಜೆ ದೇವ್ವ ಅದ್ಮಿನ ಸಬ್ಬತ್ ಕರಿ ಅರಾಮ್‌ನದನ್ ಬಿಜುಬಿ ಲೆ.

10 ದೇವ್ ಇನ ಕಾಮ್ ಖ್ವತಮ್‌ಕರೀನ್ ಕಿಮ್ ಆರಾಮ್ ಕರ್ರೊಕಿ ಇಮ್ಮಸ್ ಇನ ಆರಾಮ್ ಆವಾಳುಬಿ ಇವ್ಣ ಕಾಮ್ ಖ್ವತಮ್‌ಕರೀನ್ ಅರಾಮ್ ಕರ್ತೆ.

11 ಇನಖ್ವಾಜೆ ಅಪ್ಣೆ ಆ ಅರಾಮ್ ಲ್ಯವಾನಟೇಕೆ ಅಪ್ಣೆ ಕೋಶಿಶ್ ಕರಿಯೆ. ಅಪ್ಪಾಮ ಏಕ್‌ಛಣತೋಬಿ ಇವ್ಣಿನಿಘೋಣಿ ಅವಿಧೇಯ ಹುಯಿನ್ ಮಟಿನಾಚಾವ್ಣತೆ ಇಮ್ ರ್ಹಿಯೆ.

12 ದೇವ್ನಿ ವಚನ್ ಜಿವ್ತಜಾನ್ನು, ಕಾಮ್ ಕರ್ತುರ್‌ವಾನುಬಿ ಅಜು ಖಿವಿ ಬೇಮ್ಲೊಡಾನಿ ತಲ್ವಾರ್‌ಥೀಬಿ ಚಾಲ್ತು ರ್ಹೀನ್, ಜಾನ್ನಬಿ ಆತ್ಮಾನ, ಕೀಲ್ ಬಿಶ್ಯಾನಾಬಿ ಅಲಕ್ ಕರಾಯೆತ್ರಿ ಪರಕ್ ಪೇಶಿ ನಿಕ್‌ಳ ಎತ್ರೆಬಿ, ದಿಲ್ವಿಖ್ವಾಜ್‌ನಾಬಿ ಸೋಚ್ ಸಮಜ್‌ನಾಬಿ ಪರ್ಖಾನು ಹುಯಿರ್ದು.

13 ಇನ ನಚ್‌ರ್ಮ್ ಓಲೆ ಹುಯಿರ್ದುತೆ ಖಿವಿ ಉಬ್‌ಚಾಪ್ಪಿಬಿ ಕೊಯ್ನಿ. ಇನ ಡೋಳೇಥಿ ಲಪಿಹುಯು ಖಿವೊಬಿ ಕೊಯ್ನಿ. ಇನ ಡೋಳಾಮ ಅಖ್ವಾಬಿ ಮಿಲಮ್‌ಮಿಲ್ಲ ಛಾ. ಅಜು ಎಥ್ರಾನವಾಳನ ಅಪ್ಣೆ ಗಣ್ತಿ ದೇವ್ವಪಡಾಸ್.

ಯೇಸು ಮಹಾನ್ ಪ್ರಧಾನ ಯಾಜಕ

14 ಆಬ್ರಾಮಾಕರಿ ಗಯೋತೆ ದೇವನೊ ಛಿಯೊಹುಯಿರೊತೆ ಯೇಸುಸ್ ಅಪ್ಪುನ ಏಕ್ ಮಹಾಯಾಜಕ್ ಹುಯಿರೊಸ್. ಇನಖ್ಲಾಜೆ ಅಪ್ಪೆ ಛಾತೆ ವಿಶ್ವಾಸ್ ಘಟ್ ಧರಿಲಿಯೆ.

15 ಶನಕತೊ ಅಪ್ಪುನ ಛಾತೆ ಮಹಾಯಾಜಕ್ ಅಪ್ಪಿ ಕಮ್‌ಜೋರಿಮ ಅಪ್ಪುನ ಗೋರ್ ವತಳಾಕೊಂತೆ ರೈಯಿಕೊಯ್ನಿ ಯೊ ಹರೇಕ್ ವಾತೆನಿ ಬಾರೇಮ ಅಪ್ಪಿನಿತರಸ್ ಶೋದನೆ ಪಡೊಹುಯೊ. ಕತೋಬಿ ಇನೆ ಪಾಪ್ ಕರೊಸ್ ಕೊಯ್ನಿ.

16 ಇನಖ್ಲಾಜೆ ಅಪ್ಪೆ ಬರಾಬರಾನಿ ವೇಳ್ತ ಗೋರ್‌ನ ಲಿಲ್ಯಾವನಖ್ಲಾಜೆ ಇನಿ ವಾರ್‌ಖ್ವೇಡಿ ಅಪ್ಪುನ ಬರಾಬರಾನಿ ವೇಳ್ತ ಮದತ್ನಖ್ಲಾಜೆ ಹಿಮ್ಮಡಿ ಇನಿ ಕೃಪಾಸನ್ನ ಖ್ಲಾಮ್ಪೆ ಅಯ್ಕೆ.

5

1 ಅದಮ್ಲಪಾನ ಮಾಧು ಹರೇಕ್‌ಭಣೊ ಮಹಾಯಾಜಕ್ ಭೂಣೈನ್ ಅದ್ಮಿವೋನಖ್ಲಾಜೆ ದೇವ್ನು ಕಾಮ್‌ಕರಾನ ನೇಮಕ್‌ಹುಯೊ, ಯೋ ಪಾಪ್ ಪರಿಹಾರ್‌ಖ್ಲಾಜೆ ಕಾಣೈಬಿ ಅಜ್ಜು ಬಲಿ ದೆವ್ವು.

2 ಯೋಬಿಜಿನು ತಾಖತ್‌ಕೊಂತೆ ಇನಖ್ಲಾಜೆ ಯೋ ಖ್ಲಿಯಿಲನಾಬಿ, ಅಜ್ಜು ವಾಟ್ ಛುಕವಾಳನಾಬಿ ದಯಾ ಕರಾನ ಶಕತ್‌ವಾಳೊ ಹುಯಿರೊಸ್.

3 ಆ ಕಮ್‌ಜೋರಿನ ಖ್ಲಾಜೇಡಿ ಯೋ ಅದ್ಮಿನಖ್ಲಾಜೆ ಕಿಮ್ಮಿ ತಿಮ್ಮಸ್ ಇವ್ವ ಇವ್ವ ಪಾಪ್‌ಖ್ಲಾಜೆ ಬಲಿ ದೆವ್ವು.

4 ಕೋಣ್‌ಬಿ ಇನೇಡಿ ಯೋಸ್ ಆ ಇಜ್ಜತ್‌ನಿ ಪದವಿನ ಲೀಲ್ಯಾವನ ಕೊಹುವ್ವಾನಿ, ಕತೊ ಆರೋನನಿ ಘೋಣಿಸ್ ದೇವ್‌ಡಿ ಬುಲಾವವಾಳೊ ಹುಯಿನ್ ಇನಾಭಣಿ ಕರಿರಾಖೊಸ್.

5 ಇಮ್ಮಿಸ್ ಪರಕ್ತ ಕ್ರಿಸ್ತಬಿ, ಮಹಾಯಾಜಕ ಕರಿ ಇನುಯೋಸ್ ಮಹಿಮೆ ಕರೀನ್ ಪಸಂದ್ ಕರೊಕೊಯ್ನಿ. ಕತೋಬಿ “ತೂ ಮಾರೊ ಛಿಯೊ ಆವಖ್ತ ಮೇ ತುನ ಬಾ ಹುಯಿರೊಸ್.

6 ಇನೆ ಬಿಜೇಕ್ ಬಾಙೂಮ, “ತೂ ಹರ್‌ಹಗಾಮ್‌ಬಿ, ಮೆಲ್ಚಿಜೆದೇಕ್‌ನೊ ಘೋಣಿನೊ ಯಾಜಕ” ಕರಿ ಬೋಲಿರಾಖ್ಯೊಸ್.

7 ಕ್ರಿಸ್ತ ಯೋಸ್ ಜಗತ್‌ಮ ಅದ್ಮಿಹುಯಿನ್ ಜಿವ್ಣು ಕರ್ರೊತೆ ಹಗಾಮ್ ಮರಣ್‌ಥಿ ಲ್ಹುಕ್ಯೆನ್ ಬಚಾಡನು ಶಕತ್‌ವಾಳನ ಘಟ್‌ಥಿ ಪ್ರಾರ್ಥನೆ ಕರ್ತೊಹುಯಿನ್ ಡೋಳಾನ ಆಂಝೇಥಿ ಪ್ರಾರ್ಥನೆನಿ ಬಿಂತಿ ಕರ್ರೊ ಇನಖ್ವಾಜೆ ದೇವ್ ಉಪ್ಪರ್‌ಥೀತೆ ಡರ್-ಭಕ್ತಿನಖ್ವಾಜೆ ಇನಿ ಪ್ರಾರ್ಥನೆನ ದೇವ್ ಖ್ವಮ್‌ಜ್ಯೊ.

8 ಕತೋಬಿ ಯೋ ಥಿಯೊ ಹುಯಿರ್ರೊತೋಬಿ ಇನೆ ಲಿದೋತೆ ವದೇಖ್‌ಥೀಸ್ ಹೇಟು ಹುವಾನು ಶಿಕಿಗಯೊ.

9 ಆ ನಾಹುಯಿನ್ ಇನೆ ಭರ್‌ಪೂರ್ ಕರೀನ್, ಇನ ವಿಧೇಯಹುವಾಳ ಅಖ್ಬಾನಾಬಿ ಹಮೇಶ ರಕ್ಷಣೆನಖ್ವಾಜೆ ಬಣ್ಣೊ.

10 ಕಾಹೆತೆ ಯೊ “ಮೆಲ್ಚಿಜೆದೇಕ್‌ನೊ ಘೋಣಿನೊ” ಮಹಾಯಾಜಕ್ ಹುಯಿನ್ ದೇವ್‌ಥಿ ನೇಮಕ್ ಹುಯೊ.

ವಿಶ್ವಾಸ್ ನಾ ಮ್ಹೇಲಿಜಾವ್ಣುಕರಿ ಬಾರೇಮ ರ್ಹೇತಾವ್ಣಿ

11 ಆ ಬಾರೇಮ ಹಮೆ ಬೋಲಾನು ಕೆತ್ರೇಕ್ತಿ ಲ್ಹಾ. ಕತೋಬಿ ತುಮೆ ಖ್ವಮ್‌ಜಾಮ ಮಂದ್ ಲ್ಹಾತೆ ಖ್ವಾಜೇಥಿ ತುಮುನ ಬೋಲಿ ವತಾಳನು ಮುಶ್ಕಿಲ್ ಹುಯಿರ್ರೊಸ್.

12 ಅತ್ರಸ್ತ ತುಮೆ ಶಿಕಾಡವಾಳು ಹುಯಿರ್ರೊಣುಧು ತೋಬಿ, ದೇವ್ಣು ವಚನ್ನು ಪಹಿಲೆ ಛಾತೆಪಾರಅಖ್ಪು ಅಜೇಕ್ ಭಣು ತುಮುನ ಪಾಳ್ತು ಶಿಕಾಡ್ಪಡ್ಪು ತುಮುನ ಹಮ್ಗೆ ದೂದ್ನು ಜರೂರತ್ ಲ್ಹಾ ಪಣ್ಣಿ ಘಟ್ ಖಾಣುಕಾಹೆ.

13 ದೂದ್ ಪಿಯಾವಳು ಅಡ್ಡಾಣಿನಿಘೋಣಿ ರ್ಹೊನ್ ಅಲ್ಫು ಅಙ್ಗು ಖರಾಬ್‌ನಿ ಬಾರೇಮ ಖ್ವಯಾಲ್ ಕೊಯ್ಣಿ.

14 ಘಟ್ ಖಾಣು ಜಾನ್‌ಜಮಾನ್‌ಖ್ವಾಜೆ, ಕತೊ ಗಲತ್ ಅಙ್ಗು ಬರಬರ್ಥಿರ್ರೊಸ್ತೆ ಇನ ಖ್ವಣೇದ್ ಕರಾನ, ಆದರ್ಥಿ ಪುರ್ಗುಲ್ ಹುಯಿರ್ರೊವಾಳನಖ್ವಾಜೆ ಹುಯಿರ್ರೊಸ್.

6

1 ಇನಖ್ವಾಜಿ ಕ್ರಿಸ್ತನಿ ಬಾರೇನು ಶುರುವಾತ್ನು ಶಿಕಾಡಾನು ಮ್ವೇಲಿನ್, ಜಾನ್‌ಕೊಂತೆ ಕಾಮ್‌ಥಿ ಮನ್ ಫರಿಜಾವಾನುಬಿ, ದೇವ್‌ಮ ಭರೋಖ್ವೊರಾವಿನ್, ದೇವ್‌ಮ ವಿಶ್ವಾಸ್ ರಾಖೊ,

2 ಬ್ಯಾಪ್ತಿಸ್ಮನಿ ಬಾರೇಮ ಬೋಲ್ವುಕತೊ, ಹಾತ್‌ಮ್ವೇಲಾನುಬಿ, ಪಾಲ್ಟುಜಿವ್ವು ಹುವಾನುಬಿ ಅಜ್ಜು ಹರ್‌ಹಮೇಶಾನು ನ್ಯಾಯತೀರ್ಪ್‌ನ ಬಾರೇಮ ತುಮುನ ಖ್ವಮ್‌ಜಾಡ್ವೆರ್‌ವ್ವಸ್.

3 ತು ದೇವ್ ಸ್ವೀಕಾರ್ ಕರಿಲ್ಯಾವನು ಉಷೇತೊ ಅಪ್ಪೆ ಶಾತ್‌ಕರಾನ ಹುವಾನು.

4 ಶನಕತೊ ಏಕ್‌ಹಲ್ಲ ಉಜಾಳನ ಲೀರಾಮ್ಪುಸ್‌ಕಿ ಅಜ್ಜು ಕೋಣ್ ಪರಲೋಕ್‌ನ ವಾರ್ಖಾನ್‌ನಿ ಲಜತ್ ದೇಖಿರಾಮ್ಪುಸ್ಕಿ ಅಜ್ಜು ಪವಿತ್ರಾತ್ಮಮ ವಾಟೊ ಲೀರಾಮ್ಪುಸ್ಕಿ,

5 ಅಜ್ಜು ದೇವ್ ವಚನ್ನಿ ಅಟ್ಟಿಫಣ್ಣೆನು ಲಜತ್ ದೇಖಿರಾಮ್ಪುಸ್ಕಿ ಅಜ್ಜು ಅಗ್ಗ್ ಆವ್‌ಶೇತೆ ಜಗತ್ತಿ ಶಕತ್ತ್ ಲೀಲ್ಯಾವಾಳು ಹುಯಿರ್‌ವ್ವಸ್.

6 ಅಜ್ಜು ಇವ್ಣೆ ಇವ್ಣೆ ವಿಶ್ವಾಸ್ ರಡ್ಡಿ ಜಾವಾಳ ರದ್ದಯಾತೊ ಇವ್ಣುನ ಪಾಲ್ಟು ಮನ್ ಫರಾವ್ಣುಕತೊ ಇವ್ಣೆ ಇವ್ಣೆ ನಫೊಕೊಂತೆ ಖ್ವಾಜಿ ದೇವ್ ಛಿಯ್ಯಾನ ಪಾಲ್ಟು ಶಿಲ್‌ಬೆಪರ್ ನಾಕ್‌ಶೆ. ಅಜ್ಜು ಇವ್ಣೆ ಅಖ್ವಾನ ಖ್ವಾಮ್ಣೆ ಇನ ಖ್ವರಮ್ ಕಾಡ್‌ಶೆ.

7 ಜಮೀನ್ ಇನಪರ್ ಕೆತ್ರಿಕ್ಕಿ ಹಲ್ಲ ವರ್ಖಾತ್ತ್ ಪಾಣಿನ ಖ್ವೊಶಿಲಿನ್ ಅಜ್ಜು ಯೊ ಕಿನ ಖ್ವಾಜೀಥಿ ಪಿಕಾವ್ಣಿ ಕರಾವಸ್ಕಿ, ಇವ್ಣುನ ಫಾಯಿದಾನು ಅನಾಜ್‌ನ ದೇಸ್, ಯೋ ದೇವ್ ವಾರ್ಖಾನ್ ಲೀಲೇಸ್.

8 ಕತೋಬಿ ಯೋ ಕಾಟಾನ ಟಾಪ್‌ಣ್ಣನಾಬಿ ಶತ್ತೆನಾಬಿ ಫೋಡಾಯೊತೊ ಯೊ ಫಾಯಿದೊಕೊಂತೆ ಖ್ವಾಜಿ ಶಾಪ್ಪ ಶುಶತ್ ಹುವಾಸ್. ಖ್ವರ್ತಿಮ ಯೋ ಬಳ್ಳೆಜಾಸ್.

9 ಕತೋಬಿ ಪ್ಯಾರ್‌ನ ದೋಸ್ತಿವೊ ಅಮ್ಮಿ ಪರಕ್‌ಥಿ ಹಮೆ ವಾತೆಬೋಲ್ವತೋಬಿ ತುಮಾರಿ ವಿಚಾರ್‌ಮ ರಕ್ಷಣೆನ ಹೋಣುತೆ ಯೋ ಖ್ವಾರಾಮ ತುಮೆ ಛಾಕರಿ, ಹಮೇ ಖ್ವಾಚಾಮ ವಿಶ್ವಾಸ್ ಕರಿಯೇಸ್;

10 ತುಮೆ ದೇವ್ವ ಅದ್ವಿವೋನ ಮದತ್ ಕರಿರಾಖ್ಯಸ್, ಉಜೂಬಿ ಕರುಕರಸ್ ಆ ಕಾಮ್ವ ಅಜು ತುಮೆ ಇನ ನಾಮ್ವ ವತಾಳ್ಕತೆ ಪ್ಯಾರ್ನ್ಯೊ ಬೈಕಕೊಯ್ನಿ ಶನಕತೊ ದೇವ್ ಅನೀತಿವಾಳೊ ಕಾಹೆ.

11 ವಿಶ್ವಾಸ್‌ನಿ ಪೂರ ಬರೋಬರ್‌ಧಿ ಲೀಲ್ಯಾವನಖ್ವಾಜೆ ತುಮಾರಮ ಹರೇಕ್ ಜಣು ಖರ್ತಿಲಗೂಬಿ ತುಮೆ ಯೋಸ್ ಕೋಶಿಶ್ ಕರ್ತುರ್ದೇವ್ವಕರಿ ಮೇ ಘಣು ಹರ್‌ಖ್ವಾಸ್.

12 ತುಮೆ ವಳ್‌ಶಿಕರಾವಳ ಹುಯಿರ್ದೇಣು ಕರಿ ಇಷ್ಟಕರುಕೊಯ್ನಿ ಇನ ಬದಲ್ ವಿಶ್ವಾಸ್‌ಧೀಬಿ ಖ್ವಮಾಳಿರ್ದವಾಧೀಬಿ ವಾಗ್ವಾನ್ನ್ ಹಕ್ ಲೀರಾವವಾಳನ ದೇಖಿನ್ ಚಾಲವಾಳ ಹುಯಿರ್ದೇವೊ.

ದೇವ್ವಿ ಘಟ್ ವಾಗ್ವಾನ್

13 ದೇವ್ವೆ ಅಬ್ರಹಾಮ್‌ನ ವಾಗ್ವಾನ್ ಕರಾಖ್ವತರ್ ಇನೇಧಿಬಿ ಊಚು ಕೋಣ್‌ಬಿಕೊಂತೆ ಇನಖ್ವಾಜೆ ಇನ ನಾಮ್‌ಪರ್ ಯೋಸ್ ಆಣ್ ಲೀನ್,

14 “ಮೇ ತುನ ವಾಗ್ವಾನ್ ಕರುಸ್ ಮೇ ತುನ ವಾರ್‌ಖೊದೀನ್ ತಾರು ಪಿಳ್ಳಿನ್ ಭಡೈಷ್” ಕರಿ ಖಲಿ ಬೋಲ್ಯೊ.

15 ಅಮ್ ಅಬ್ರಹಾಮ್‌ನೆ ಖ್ವಮಾಳವಾಳೊ ಹುಯಿನ್ ಟಿವೈರ್ದೇನ್ ವಾಗ್ವಾನ್ನ್ ಲೀಲಿದೊ.

16 ಅದ್ವಿಖ್ವಾರು ಇವೈಧಿಬಿ ಊಚಾವ್‌ನ ಉಪ್ಪರ್ ಆಣ್‌ಲೇಸ್, ಅಮ್ ಆಣ್‌ಲೀನ್ ಪ್ರಮಾಣ್ ಕರೀನ್, ಇನೇಧಿ ಆಡ್‌ಫೇಡ್ ಖತಮ್ ಹುವಾಸ್.

17 ಇಮ್‌ಮಸ್ ದೇವ್ ಇನಿ ಖ್ವಾಜ್ ನಾ ಬದಲ್ವಕರಿ ವಾಗ್ವಾನ್ನ್ ಆಣ್‌ಕರಿನ್ ಘಟ್‌ಕರ್ದೊ.

18 ದೇವ್ವಿ ವಾಗ್ವಾನ್ ಅಜು ಆಣ್. ಆ ಭೇಬಿ ಕೆದೆಕೆದೇಬಿ ರ್ವಾಣಿ ಆಧಾರ್ ಖ್ವಾರು. ಶನಕತೊ ಅನಿಬಾರೇಮ ದೇವ್ ಅಪ್ಪುನ ರಗಾವವಾಳೋಸ್ ಕಾಹೆ. ಇನಖ್ವಾಜೆ ಆಖ್‌ರೊ ಲೀಲೆವ್ವಕರಿ ನಾಶಿ ಆಯಿನ್ ಅಪ್ಪ ಖ್ವಾಮ್ವೆ ಮೈಲಿರಾಖ್ಯೊತೆ ಭರೋಖ್ವಾನ್ ಧರಿರಾಖ್ಯತೆ ಅಪ್ಪುನ ಘಣು ಹುಮ್‌ಖ್ವೆಮಳನಿತರಹುಯು.

19 ಅಪ್ಪನ ಯೋ ಭರೋಖ್ಹೊ ಅಪ್ಪ ಜಾನ್ನ ನಂಬಾಖ್ಹರ್ಕು ಅಪ್ಪಿ ಜೀವನ್ನು ದೋಣಿನ ಘಟ್‌ಥಿ ಭಿರಾಖನು ಲಂಗಾರ್ ಹುಯಿರ್ದೊಸ್. ಯೋ ಜಾಖ್ಹತ್ ಪರಿಶುದ್ ಝಗೋನು ಪಡ್ಡಾನ ಮಹಿ ಪೇಖ್ವಾವಳು ಹುಯಿರ್ದೊಸ್.

20 ಹಿಜ್ಜಾ ಯೇಸು ಹರ್‌ಹಗಾಮಾಬಿ ಮೆಲ್ಚಿಜೆದೇಕ್‌ನಿ ಘೋಣಿನೊ ಮಹಾಯಾಜಕ್ ಹುಯಿನ್, ಅಪ್ಪಖ್ವಾಜೆ ಪಹಿಲೆಥೂಸ್ ನಿಕ್ಕಿನ್ ಯೋ ಸನ್ನಿಧಿಮ ಜೈರ್ದೊಸ್.

7

ಮೆಲ್ಚಿಜೆದೇಕ್ ಏಕ್ ಯಾಜಕ್

1 ಆ ಮೆಲ್ಚಿಜೆದೇಕ್ ಸಾಲೇಮಾನೊ ರಾಜ್ ಅಜ್ಜು ಘಣೊಲೂಚೊ ಹುಯಿರ್ದವಾಳೊ ದೇವಾನೊ ಯಾಜಕಬಿ ಹುಯಿರ್ದೊಡ್ಲೊ. ಅನೆ ರಾಜ್‌ವ್ವ ಸಂಹಾರ್ ಕರೀನ್ ಪಾಟ್ಲೊ ವಳ್ಳವೊಡೊತೆ ಅಬ್ರಹಾಮ್‌ನ ಮೊರೇಹುಯಿನ್ ಇನ ಆಶೀರ್ವಾದ್ ಕರ್ದೊ.

2 ಇನ ಅಬ್ರಹಾಮಾನೆ ಯೋ ಜ್ಯುತಿಲೀನ್ ಆಯೊಡೊತೆ ಅಖ್ವಾಸ್ ಜಿನಖ್ವಾಮ ದಖ್ವಾಮ ಏಕ್ ಭಾಗ್ ದಿದೊ. “ಮೆಲ್ಚಿಜೆದೇಕ್ ಕರಿ ನಾಮ್‌ನೀತಿನೊ ರಾಜ್ ಕರೀಬಿ ಅನಕೇಡೆಥು ಸಾಲೇಮಾನೊ ರಾಜ್‌ಕತೊ ಸಮಾಧಾನೊ ರಾಜ್” ಕರೀಬಿ ಮತ್ಲಬ್.

3 ಇನ ಆಯಕೊಯ್ನಿ ಬಾಕೊಯ್ನಿ ಖಾನ್‌ದಾನ್‌ಬಿ ಕೊಯ್ನಿ ಪೈದಾಖ್ವಾಬಿ ಕೊಯ್ನಿ ಮರಣ್‌ಬಿ ಕೊಯ್ನಿ ಯೋ ದೇವ್ನ ಛಿಯ್ಯಾನಿತರ ರ್ದೊನ್, ಹಮೇಶಾನೊ ಯಾಜಕ್‌ಹುಯಿರ್ದೊಸ್.

4 ಆ ಹೈರೋತೆ ಕೆತ್ರಿ ಮಹಾನ್ ಹುಯಿರ್ದೊಸ್ ಕರಿ ದೇಖೊ ಅಪ್ಪೊ ಗುರುಗುರಬ್‌ಲೊ ಹುಯಿರ್ದೊತೆ ಅಬ್ರಹಾಮಾನೆ ಜಂಗ್ ಜೂತಿನ ಲಾಯೊತೆ ಜಿನಖ್ವಾಮ ದಖ್ವಾಮ ಏಕ್ ಭಾಗ್ ಇನ ದಿದೋನಿ.

5 ಖ್ವಾಚಮಾಬಿ ಲೇವಿನ ಖೂಮ್ಮಯಾಜಕ್ನು ಕಾಮ್ ಲೀರಾಖವಾಳು, ಅದ್ವಿಧಿ ಕತೊ ಅಬ್ರಹಾಮಾನು ಖಾಂದಾನ್‌ವಾಳಧಿ ದಖ್ವಾಮ ಏಕ್ ಭಾಗ್‌ಖ್ವಾರು ಲ್ಯಾವಾನ ಧರ್ಮಶಾಸ್ತ್ರಮ ಹುಕುಮ್ ಲ್ಹಾ.

6 ಕತೋಬಿ ಮೆಲ್ಕಿಜೆದೇಕ್ ಲೇವಿನು ಖಾನ್‌ದಾನ್‌ವಾಳನ ಮಳ್ಳೊಹುಯೊ ಕಾಹೆ, ರ್ವಯುತೋಬಿ ಆಬ್ರಹಾಮ್ ಥಿ ದಖ್ಖನು ಏಕ್‌ಭಾಗ್‌ಗ್ಲಿದೊತೆ ಕಾಹೆತೆ ದೇವ್‌ಥಿ ವಾಗ್ದಾನ್ ಲೀರಾಖವಾಳೊ ಆಬ್ರಹಾಮ್‌ನ ವಾರ್‌ಖೊದಿದೊ.

7 ಆಶೀರ್ವಾದ್ ಲ್ಯವಾಳಾಥೀಬಿ, ಆಶೀರ್ವಾದ್ ಕರವಾಳೋಸ್ ಊಚೊ ಕರಿ ಬೋಲಾಮ ಶನು ಶಕ್ ಕೊಯ್ನಿ.

8 ದಖ್ಖಮ್ ಭಾಗ್‌ಗ್ಲಿ ಲ್ಯವಾಳ ಯಾಜಕ್‌ಖ್ವಾರು ಏಕ್‌ಕೊಂತೆ ಏಕ್‌ದನ್ ಮರಾಸ್. ಕತೋಬಿ ಆಬ್ರಹಾಮ್‌ಥಿ ದಖ್ಖಮ್ ಭಾಗ್‌ಗ್ಲಿ ಲೀರಾಖವಾಳೊ ಮೆಲ್ಕಿಜೆದೇಕ್ ಕೆದೇಬಿ ಜಿವೊರ್ದೆಶೆ ಕರಿ ಧರ್ಮಶಾಸ್ತ್ರಮ ಬೋಲ್ಪೆರ್ದುಸ್.

9 ಅಜ್ಜು ದಖ್ಖಮ್ ಭಾಗ್‌ಅಖ್ವು ಲೇಸ್ತೆ ಲೇವಿಬಿ ಜಿನು, ಅಬ್ರಹಾಮ್‌ಥಿ ದಖ್ಖಮ್ ಭಾಗ್‌ಅಖ್ವು ದ್ಯಾವನಿತರಹುಯು.

10 ಕಿಮ್ ಕತೊ, ಮೆಲ್ಕಿಜೆದೇಕ್ ಅಬ್ರಹಾಮ್‌ನ ಮ್ಹೋರೆಹುವಾನಿ ವಖ್ತೆ, ಲೇವಿ ಬಿಜೂಬಿ ನಾ ಪೈದಹುಯಿರ್ದೊತೋಬಿ ಅಬ್ರಹಾಮ್‌ನ ಶರೀರ್ಮಳಿರ್ದೊಥೊ.

11 ಇಸ್ರಾಯೇಲ್‌ವಾಳನ ದೆವಾಯುತೆ ಧರ್ಮಶಾಸ್ತ್ರ ಲೇವಿವಾಳನು ಯಾಜಕ್‌ನು ನಿಯಮ್‌ಪರ್ ಆಧಾರ್ ಹುಯಿರ್ದುಸ್. ಲೇವಿವಾಳನು ಅಮ್ಮ ನಿಯಮ್‌ಥೀಸ್ ಪೂರಹುವಾನು ರ್ವಯುತೊ. ಆರೋನ್ನ್ ಖಾನ್‌ದಾನ್ನ್ ಕೊಮಳನಿತೆ, ಮೆಲ್ಕಿಜೆದೇಕ್‌ನಿ ಖಾನ್‌ದಾನ್‌ಮ ಮಳ್ಳೊಹುಯೊ ಬಿಜೇಕ್‌ಜಣೊ ಯಾಜಕ ಆವಾನಿ ಜರೂರತ್ ಶಾತ್‌ಥಿ?

12 ಯಾಜಕ್ಕು ಪದವಿ ಬದ್ಲಾನು ರ್ವಯುತೊ. ಧರ್ಮಶಾಸ್ತ್ರ ಜಿನು ಬದ್ಲಾನು ಜರೂರತ್ ಲ್ಹಾ.

13 ಕತೋಬಿ ಆಹೈರುತೆ ಕಿನಿ ಬಾರೇಮ ಬೋಲ್ಪೆರ್ದೊಸ್ಚಿ ಯೋ ಹೈರುತೆ ಬಿಜೇಕ್ ಖಾನ್‌ಖೋಜ್‌ನ ಮಳ್ಳೊಹುಯೊ. ಯೋ ಖಾನ್‌ಖೋಜ್‌ನ ಏಕ್‌ಜಣೋಬಿ ಚಾಚರ್‌ಕನ ಸೇವೆ ಕರ್ದೊಕೊಯ್ನಿ.

14 ಅಪೊಲ್ ಪ್ರಭು ಯೆಹೂದ ಖಾನ್‌ಖೋಜ್‌ಮ ಪೈದಾ ಹುಯಿನ್ ಆಯೊಹುಯೊಕರಿ ಅಲ್ಫಿನಿತರ ಮಾಲುಮ್‌ಪಡಸ್; ಆ

ಖಾನ್‌ಖೋಜ್‌ನ ಯಾಜಕವು ಬಾರೇಮ ಮೋಶೆನ ಶಾಸ್ತ್ರಿ ಬೋಲ್ಯೊ ಕೊಯ್ತು.

ಮೆಲ್ವಿಜೆದೇಕನಿಫೋಣಿನೊ ಬಿಜೇಕ್ ಯಾಜಕ್

15 ಮೆಲ್ವಿಜೆದೇಕನಿತರ ಬಿಜೇಕ್ ಯಾಜಕ್ ಆವಶೇಕರಿ ಬೋಲಾನು ರ್ವಯೂತೊ ಯೋ ಬಿಙ್ಗೂಬಿ ಘಣು ಆಲ್ಟಿಂತರ ಮಾಲುಮ್ ಪಡಸ್ಸಿ.

16 ಆ ಯಾಜಕ್ ಶರೀರ್ ಸಂಬಂದ್ ಪಡಾಸ್ತೆ ನಿಯಮಾನಿ ಪರಕ್ ಕೊಹುಯುನಿತೆ, ಜಾನ್ನ್ ಶಕತ್ತ್ ಆಧಾರ್‌ಧಿ ಮಟಾಕೊಂತೆ ರ್ವಿಶ್ತೆ.

17 ಇನಿ ಬಾರೇಮ ತೊ ಅಖ್ವಾ ಜಗ್‌ಜಮಾನಮಾಬಿ, ಮೆಲ್ವಿಜೆದೇಕನಿ ಫೋಣಿನೊ ಯಾಜಕಾಸಕ್‌ರಿ ಧರ್ಮಶಾಸ್ತ್ರ ಬೋಲಸ್.

18 ಶನಕತೊ ಪಹಿಲೆಥೂತೆ ಹುಕುಮ್ ಕಮಾಜೋರಿಬಿ ಫಾಯಿದೊಕೊಂತೆಬಿ ಹುಯಿರ್ವ್ವಿತ್ತೆಖ್ವಾಜೆ ಯೊ ಭೀರಿಗು.

19 ಧರ್ಮಶಾಸ್ತ್ರ ಶನಾಬಿ ಪೂರ ಕೊಕರಾನಿ. ಅಙ್ಗು ಇನ ಬದಲ್ ದೇವ್‌ಕನ ಜೈನ್ ಲೀಲಾವನುಸ್ ಭರೋಖೊ ಹುಯಿರ್ವ್ವಿತ್.

20 ಆ ಬಿಙ್ಗೂಬಿ ಬೋಲ್ವುಕತೊ ಆಣ್‌ಕೊಂತೆ ಕಾಹೆ. ಅನಾಹುಯಿನ್ ಲೇವಿವಾಳು ಆಣ್ ಕೊಂತೆ ಯಾಜಕ್‌ಬಣ್ಣು.

21 ಯೋತೋಬಿ ಆಣ್‌ಧಿ ಯಾಜಕಹುಯೊ. ಕತೋಬಿ ದೇವ್ ಇನ ಅಮ್ ಬೋಲ್ಯೊ, “ತು ಹರ್‌ಹಗಾಮಾಬಿ ಯಾಜಕ್ ಹುಯಿರ್ವ್ವಿತ್; ಅಙ್ಗು ಪ್ರಭು ಹುಯಿರೋತೆ ಮೇ ಕೋಲ್‌ನಾಮ್ ಕರಿನ್ ಬೋಲಿರಾಖ್ಯೊಸ್. ಅಙ್ಗು ಮಾರೊದಿಲ್ವ ಕೊಬದ್‌ಲೈಶ್‌ನಿ ‘ತು ಕದೇಬಿ ಯಾಜಕ ಹುಯಿರ್ವ್ವಿತ್.’”

22 ಅನಿ ಫರಕ್ ಶಾತ್‌ಕತೊ ಯೇಸು ಆಣ್‌ನಿ ಝೆಡ್‌ಮಾಸ್ ಮಹಾನ್ ಒಪ್ಪಂದಾನ ಆಧಾರ್ ಹುಯೊ.

23 ಬಿಜೇಕ್ ಫರಕ್ ಶಾತ್‌ಕತೊ: ಕೈಫಕ್ ಙ್ಗು ಯಾಜಕ್ ಹೋಣು ಪಡ್ವುಧು. ಶನಕತೊ ಲೇವಿವಾಳು ಮರುಕರ್ತುಥುತೆ ಇನಖ್ವಾಜೆ ಯೊ ಕಾಮ್ ಚಲಾವನ ಕೊಹುಯುನಿ.

24 ಕತೋಬಿ ಯೇಸುತೋಬಿ ಕದೇಬಿ ಜಿವ್‌ಶೇತೆ ಇನಖ್ವಾಜೆ ಇನು ಯಾಜಕ್ ಧರಮ್ ಕೋಣ್‌ಬಿ ಕರಾನ ಕೊಹುವಾನಿ.

25 ಇನಖ್ವಾಜಿ ಯೋ ಇನೇಥಿ ದೇವ್‌ಕನ ಆವಾಳಾನ ಪೂರ ಬಚ್ಚಾಡನ ಶಕತ್‌ವಾಳೊ ಹುಯಿರ್ರ್ಹೊಸ್. ಶನಕತೊ ಇವ್ವಖ್ವಾಜಿ; ದೇವ್‌ಕನ ಬಿಂತೀಕರಾನ ಕೆದೇಬಿ ಜಿವಿರ್ರ್ಹವಾಳೊ ಹುಯಿರ್ರ್ಹೊಸ್.

26 ಇನಖ್ವಾಜಿ ಅಪ್ಪುನ ಹೋಣುತೆ ಇನ ಪೂರಕರಾವಳೊ ಮಹಾಯಾಜಕ ಹುಯಿರ್ರ್ಹೊಸ್ ಪರಿಶುದ್ಧಿ ದೋಷ್‌ಕೊಯ್ನಿತೇಬಿ, ಮೈಲಾಪ್‌ಕೊಯ್ನಿತೇಬಿ, ಪಾಪಿಮ ಮಳಾಕೊಂತೆ ನಿರ್ರ್ವಾಳೊಬಿ ಹುಯಿರ್ರ್ಹವಾಳೊಬಿ ಆಕಾಶ್ ಮಂಡಲ್‌ಧೀಬಿ ಊಚ್ಚಾಮ ರ್ಹವಾಳೊ.

27 ಪಹಿಲೆ ಇವ್ವ ಪಾಪ್ ಪರಿಹಾರ್ನ್ ಖ್ವಾಜಿ ಇನಪಾರ್ ಅದ್ಮಿವ್‌ನ ಪಾಪ್ ಪರಿಹಾರ್ನ್ ಖ್ವಾಜಿ; ಬಲಿ ಸಮರ್ಪಣ್ ಕರಾಸ್ತೆ ಲೇವಿನ ಮಹಾಯಾಜಕರ್‌ನಿತರ ಆ ಹೈರುತೆ ಹರೇಕ್ ದನ್‌ಬಿ ಬಲಿಖ್ವಾರ್ಡು ಅರ್ಪಣ್ ಕರಾನು ಜರೂರತ್ ಕೊಯ್ನಿ. ಶನಕತೊ ಆ ಹೈರುತೆ ಇನ ಯೋಸ್ ಅರ್ಪಣ್ ಕರಾನಿವಖ್ವಾತೆ ಅಖ್ವಾನಿ ಪಾಪ್‌ಖ್ವಾಜಿ ಎಕ್ಕ್‌ಸ್ ಹಲ್ಲ ಬಲಿ ಅರ್ಪಣ್ ಕರ್ರ್ಹೊ.

28 ಧರ್ಮಶಾಸ್ತ್ರ ಕಮ್‌ಜೋರಿ ಆದ್ಮಿವ್ವ ಮಹಾಯಾಜಕರ್ ಕರಿನ್ ನೇಮಕ್ ಕರಾಸ್. ಕತೋಬಿ ಧರ್ಮಶಾಸ್ತ್ರನ ವಾರ್ ಆಣ್‌ನಿ ಜೋಡ್ಡ್ ಆಯೊತೆ ವಚನ್ ಕದಕದೇಬಿ ಅಖ್ವೊಸ್ ಪೂರ ಹುಯಿರೋಸ್ತೆ ಛಿಯ್ಯಾನಸ್ ಯಾಜಕ ಕರಿನ್ ನೇಮಕ್ ಕರಿರಾಖ್ವೊಸ್.

8

ಯೇಸು ಅಪ್ಪೊ ಮಹಾಯಾಜಕ್

1 ಹಮ್ಮೆ ಹಮೆ ಬೋಲಾನಿ ವಾತೆಖ್ವಾರಿ ಜರೂರ್ರ್ವಾತೆ ಶಾತ್‌ಕತೊ, ಪರ್‌ಲೋಕ್‌ಮ ಊಚಿ ಸಿಂಹಾಸನ್ನ ಖಾವಿಬಾಚ್ಚುಮ ಬೇರೊರ್ರ್ಹವಾಳೊ ಮಹಾಯಾಜಕ್ ಅಪ್ಪುನ ಛಾ.

2 ಯೋ ಪವಿತ್ರ ಝಗೋಮ ಅದ್ಮಿಧಿಕಾಹೆತೆ, ಪ್ರಭುನೇಸ್ ಬಣಾಯೋತೆ ದೇವ್ನು ದರ್ಶನಾನ ಡೇರಾಮ ಯಾಜಕ್ಕು ಕಾಮ್‌ಕರಾವಾಳೊ ಹುಯಿರ್ರ್ಹೊಸ್.

3 ಹರೇಕ್ ಮಹಾಯಾಜಕ್‌ಬಿ ದೇವ್ವ ಕಾಣ್ಕೆಬಿ ಬಲಿ ಸಮರ್ಪಣ್ ದೇವ್ವ್ವ ಇನಾಖ್ವಾಜೆ ಅಪ್ಪೊ ಮಹಾಯಾಜಕ್‌ಬಿ ದೇವ್ವ ಶಾತ್ನೋಬಿ ದೈವಾನು ಙರೂರತ್ ಛಾ.

4 ಯೋ ಙಮೀನ್‌ಪರ್ ರ್ವೋಹೊತ್ತೊ ಯಾಜಕ್ ಬಣ್ಣೊಹೋತ್ ಕೊಯ್ವಿ. ಶನಕತೊ ಧರ್ಮಶಾಸ್ತ್ರನಿ ಪರಕ್ ಕಾಣ್ಕೆ ದೈವಾಳು ಅಗಾಡಿಧೂಸ್ ಛಾ.

5 ಮೋಶೆ ದೇವ್‌ದರ್ಶನ ಡೇರೊ ಭಾಂದ್‌ಣುಕರಿ ರ್ವವಾನಿ ವಖ್ವೆತೆ ಮೇ ಪರ್ಭತ್‌ಮ ತುನ ವತಾಳೊತೆ ಛಾಯನಿ ಪರಕ್ಮಾಸ್ ಅಖ್ವಿ ಕರ್ನುಕರಿ ದೇವ್ವಿ ರೈತಾವ್ವಿ ಹುಯೊತೆ ಇಮ್ಮತ್ ಪರಲೋಕ್‌ಮ ಛಾತೆಅಖ್ವಿ ಛಾಳಿಬಿ, ಛಾಯಬಿ ಹುಯಿರ್ವ್ವೊಸ್ತೆ ಮಂದಿರ್‌ಮ ಇವ್ಣೆ ಚಾಕ್ರಿ ಕರುಕರಸ್.

6 ಕತೋಬಿ ಯೇಸು ಇನೇಥಿಬಿ ಮಹಾನ್ ಯೊ ಯಾಜಕವ್ವ ಕಾಮ್‌ಥೀಬಿ ಘಣು ಮಹಾನ್ ಯಾಜಕ್‌ನಿ ಸೇವೆ ಲೀರಾಖ್ಯೊಸ್. ಅಖ್ವಿ ಪರಕ್ಮ ಯೇಸು ಇನ ಆದೈವ್ವ್ವಾಜೆ ದೇವ್‌ಥಿ ಲಾಯೊತೆ ಒಪ್ಪಂದ ಙೂನೇಥೀಬಿ ಮಹಾನ್ ಹುಯಿರ್ವ್ವೊಸ್. ಶನಕತೊ ಯೊ ಅಟ್ಟಿ ವಾಗ್ದಾನ್‌ಥಿ ಅಙು ಅಟ್ಟಿ ಒಪ್ಪಂದನ ಮಳಾವವಾಳೊ ಹುಯಿರೋಸ್.

7 ಯೋ ಪಹಿಲು ಒಪ್ಪಂದ ಶನೂಬಿ ಗಲ್ಲಿ ನಾರ್ವ್ವೊಹೊತ್ತೊ, ಬೇನು ಒಪ್ಪಂದನಿ ಙರೂರತ್ ಕೋಥಿನಿ.

8 ಕತೋಬಿ ದೇವ್ವೆ ಯೋ ಅದ್ಮಿವ್‌ಪರ್ ಗಲತ್ ಲಗಾಡಿನ್ ಗಲತ್ ದೆಖಾವದಿನ್ ಅಮ್ ಬೋಲ್ಯೊ 'ಹಂದೇಖೊ, ಮೇ ಇಸ್ರಾಯೇಲ್ ಖಾನ್‌ದಾನ್‌ಥಿಬಿ ಯೆಹೂದ ಖಾನ್‌ದಾನ್‌ಥಿಬಿ ನವೇಥಿ ಏಕ್ ಒಪ್ಪಂದ ಕರಾವನು ದನ್‌ಖ್ವಾರು ಆವ್‌ಶೆ' ಕರಿ ಪ್ರಭು ಬೋಲಸ್.

9 ಆ ಒಪ್ಪಂದ ಮೇ ಅವ್ವ ಗುರುಗುರುಬ್‌ಲ್ಯನ ಹಾತ್ ಧರಿನ್ ಈಜಿವ್ವ್ವ ದೇಖ್ವೊಮಾಥೊ ಹಾತ್‌ಧರಿನ್ ಬುಲೈಲಿನ್ ಆಯೋತೆ ದನೂಮ ಇವ್ಣಿ ಜೋಡ್ಡ ಕರೀಲಿದೊತೆ ಒಪ್ಪಂದನಿತರ ಕಾಹೆ. ಶನಕತೊ ಇವ್ಣೆ ಮಾರಿ ಒಪ್ಪಂದಮ ಘಟ್‌ಥಿ ಭಿಯುಕೊಂತೆ ಇನಾಖ್ವಾಜೆ ಮೇ ಇವ್ವುನ್ ಫಿರ್ ಕೊಕರೈನಿ' ಕರಿ ಪ್ರಭು ಬೋಲಾಸ್.

10 ಯೋ ಅಖ್ಯದನ್ನ ವಾರ್ ಮೇ ಇಸ್ರಾಯೇಲ್ ಖೂಮ್‌ವಾಳನಿ ಜೋಡ್ಡ ಕರಿಲೀಶ್‌ತೆ ಒಪ್ಪಂದ ಅಮರ್‌ಶ್ಚಿಶೆ, ಮೇ ಮಾರ ಹುಕುಮ್‌ನ ಇವ್ಲ ದಿಮಾಕ್ ಮ್ಹೇಲಿಶ್. ಮೆ ಇವ್ಲ ದಿಲ್ಮ ಇನ ಲೀಖಿಶ್. ಮೇ ಇವ್ಲನ ದೇವ್ ಹುಯಿರ್ದಿಶ್. ಇವ್ಲೆ ಮಾರು ಅದ್ಮಿ ಹುಯಿರ್ದಿಶೆ.

11 ಆನಾಹುಯಿನ್ ಹರೇಕ್‌ಜಣು ಇನ ಭೀಡೆವಾಳನಬಿ ಇನ ಭೈನಾಬಿ, 'ಪ್ರಭುನ ಮಾಲುಮ್ ಕರೈವೊಕರಿ ಬೋಧನೆ ಕರ್ನುಕೊಯ್ನಿ. ಶನಕತೊ ಕೀಳ್‌ಥಿಬಿ ಧರೀನ್ ಊಚ್ ಹುಯಿರ್ದಿವಾಳು ಖ್ವಾರೊಸ್ ಮನ ಮಾಲುಮ್‌ಕರೈಶೆ.

12 “ಮೇ ಇವ್ಲ ಖರಾಬ್ ಕಾಮ್ನ ಗೋರ್‌ಥಿ ಕ್ಷಮಾಪಣ್ ಕರೀಶ್. ಅಜ್ಜು ಇವ್ಲ ಪಾಪ್ ಕದೇಬಿ ಯಾದ್ಮ ಕೋಲೈಶ್‌ನಿ; ಕರಿ ಪ್ರಭು ಬೋಲಸ್”.

13 ದೇವ್ ಅನ ನವು ಒಪ್ಪಂದ ಕರಿ ಬೋಲ್ಯೊ ಇನಾಖ್ವಾಜೆ ಪಹಿಲಿ ಒಪ್ಪಂದನ ದೇವ್ಲೆ ಜ್ಞಾನುಕರಿ ಬಣಾಯೊ. ಅಜ್ಜು ಖಿವು ಜ್ಞಾನುಧೂಕಿ ಯೋ ಮಟಿಜಾವನ ಖನ್ನೆ ಆವ್‌ಶೆ.

9

ಧರ್ತಿನು ಅಜ್ಜು ಪರಲೋಕ್ಷ ಆರಾದನೆ

1 ಪಹಿಲ ಒಪ್ಪಂದಾಮ ಆರಾದನೇನು ರೀತಿರಿವಾಜ್ ಅಖ್ವುಧು ಅಜ್ಜು ಯೊ ಝಗೋ ಅಟ್ವುಧು.

2 ಏಕ್ ದೇವ್‌ನೊ ದರ್ಶನನೊ ಡೇರೊ ಭಾರ್ ಲೋಕ್ಟೆರ್ದಿನ್, ಇನ ಪಹಿಲ ಭಾಗ್‌ಮ, ಇನ ಪವಿತ್ರಝಗೊಕರಿ ಬೋಲ್ತುಧು. ಇನಾಮ ದೀವೊ, ಮೇಜ್ ಅಜ್ಜು ದೇವ್ಲ ಸಮರ್ಪಣ್‌ಕರೈ ಹುಯೊ ರೋಟೊ ಹಿಜ್ವಾರ್‌ಟುಧು.

3 ಅಜ್ಜು ಬೇನು ಪಡ್ವಾನ ಪೀರೆ ರ್ಡ್ಲೆಸ್ತೆ ಕೋಣಾನ, ಘಣು ಪವಿತ್ರಝಗೊಕರಿ ಬೋಲ್ತುಧು.

4 ಇನಾಮ ಖೊವ್ವಾನಿ ಖ್ವಾಲರೈನು ಡಾಕ್ಟಿಬಿ ಅಜ್ಜು ಖೊವ್ವಾನು ತಗ್ಗು ಲಗಾಡ್ಯುಹುಯು ಒಪ್ಪಂದಾನು ಪಿಟಾರೊ ಥು. ಯೋ

ಪಿಟಾರಾಮ ಮನ್ನ ನಖೈರ್ದಯುಹುಯು ಖೊನ್ನಾನಿ ಕಟೋರೊಬಿ, ಆರೋನನು ಚಿಗುರ್ ಮೈಲ್ಯೊಹುಯೊ ಲಯೊ ಅಜು ದಖ್ವೊಹುಕುಮ್ ಲಿಖಾಯುಹುಯು ಒಪ್ಪಂದಾನು ಬೇ ಬಂಡಾನು ಪಲ್ಲು ಥು.

5 ಯೊ ಪಿಟಾರನಪರ್ ದೇವ್ನು ಮಹಿಮೆನು ವತಾಳನು ಕೆರೊಬಿಕರಿ ಬೇ ಪರಿಯೇ ಫಾಕ್ತಿ ಪಖ್ವಾರಿನ್ ಯೊ ಝಗೊ* ಅಖ್ವು ಮೂಚಿರಾಖ್ವು ಥು. ಇನ ಹಮ್ಗೆ ಏಕೇಕ್ ಛೋಡಿಬೋಲಾನ ಕೊಹೊಯ್ನಿ.

6 ಅಮ್ ಆ ಅಖ್ವು ತಯಾರ್ ಹುಯಿರ್ದಿನ್ ಯಾಜಕಅಖ್ವು ಯೊ ಡೇರಾನ ಪಹಿಲ ಭಾಗ್ನು ಜೈನ್, ಹರೇಕ್ ದನ್ ಹಿಜ್ಜಾ ದೇವ್ನು ಸೇವೆನು ಕಾಮ್ ಕರ್ತು ಥು.

7 ಕತೋಬಿ ಬೇನ ಕೋಣಾಮ ಮಹಾಯಾಜಕ್ ಎಕ್ಕ್ಸ್ ಭಣೊ ವರಖ್ವನ್ ಏಕ್ ವಖ್ವತ್ ಜಾತೊಥೊ. ಅಜು ಇನಿ ಜೋಡ್ತ ಬಲಿನು ಲ್ಲೊಯಿನ ಲೀನ್ ಜಾತೊಥೊ. ಯೊ ಲ್ಲೊಯಿನ ಇನಖ್ವಾಜೇಬಿ ಅಜು ಇನ ಅದ್ಮಿವ್ನು ಅಜ್ಞಾನ್‌ಧಿ ಕರ್ಯ್‌ಹುಯು ಪಾಪ್ಪಖ್ವಾಜೆಬಿ ಸಮರ್ಪಣ್ ಕರ್ನುಪಡ್ಯು ಥು.

8 ಆ ಡೇರಾನು ಪಹಿಲು ಭಾಗ್ ಅಜೂಬಿ ರ್ವಾವಾಲಗು ಘಣು ಪರಿಶುದ್ ಝಗೊನ ಜಾವನು ಮಾರಗ್ ಹಮ್ಗೆಲಗು ದೆಖಾಯುಕೊಯ್ನಿ. ಕರಿಬೋಲಾನು ಪವಿತ್ರಾತ್ಮಬೋಲಿವತಾಳಸ್.

9 ಆ ಹಮ್ಗೆನ ಹಗಾಮ್ನ ವತಾಳನು ಹುಯಿರ್ದ್ವಸ್. ಯೋ ಶಾತ್‌ಕತೊ ಕಾಣೈಬಿ ಅಜು ಬಲಿದ್ಯವಾಧಿ ಆರಾದನೆ ಕರಾವಾಳು ಇವ್ವ ಮನ್ನಿಸಾಕ್ಷಿ ಪೂರ ಕರಾನ ಕೊಹುವಾನಿ.

10 ಹಮ್ಗೆಲಗು ಇವ್ವೆಖ್ವಾರು ಖಲಿ ಖಾಣಪಾಣಿಬಿ ಅಶ್ವಾನ್‌ಧಾನ್ನಿಪದತ್ತಿ ಹುಯಿರ್ದ್ವತೆಖ್ವಾಜೆ ಆಖಲಿ ಭಾರ್ಲ್ಯು ಕಾಮ್. ದೇವ್ ಇನ ನವ ನಿಯಮ್‌ನು ಹಗಾಮ್ ಆವಲಗುಬಿ ಇಮ್‌ಮ್ ರ್ವೆಶ್ಚಿ.

11 ಕತೋಬಿ ಕ್ರಿಸ್ತ ಯೇಸು ತದೇಸ್ ಮಹಾಯಾಜಕ್ ಹುಯಿನ್ ಐರ್ದೋಸ್. ಯೋ ದ್ಯವಾನು ಅಲ್ಟು ಫಲ್ ಖ್ವಾರು ತದ್‌ನು ತದೇಸ್

* 9:5 9:5 ಪಾವ್ ಕ್ಷಮಾಪಣ್‌ನಿ ಝಗೊ

ಅಪ್ಪುನ ಛ. ಯೊ ಸೇವೆ ಕರುಕರಸ್ತೆ ಡೇರಾನ ಘರಮ ಅಗ್ಗಳಾಡಿಬಿ ಜಾಖ್ತ್ ಮಹಾನ್ ಅಜ್ಜು ಭರ್ಪೂರ್ ಹುಯಿರ್ಲ್ಲ್ಯಾ. ಆ ಅದ್ವಿನ ಹಾತೇಡಿ ಭಾಂದಿಹುಯು ಕಾಹೆ. ಆ ಲೋಕ್‌ನು ಉಬ್‌ಜಾಪ್ಪಿನ ಕಾಹೆ.

12 ಖ್ವಾರಸ್‌ನಖ್ವಾಜೆ ಮಹಾ ಪರಿಶುದ್ ಝಗೋಮ ಪ್ರವೇಶ್ ಕರೈಕ್ಕೊಯ್ನಿ. ಕೆಲ್ದೊ ಬೋಕ್‌ಡಾನ ಲೊಯಿಡಿ ಕಾಹೆ ಅಪ್ಪುನ ಕ್ರಿಸ್ತನೆ ಎಕ್ಸಸ್ ಬಾರ್ ಇನ ಶೊಂತ್ ಲೊಯಿಡಿ ಹಮೇಶಾನಿ ರಕ್ಷಣೆಮ ಗಯೊ.

13 ಬೋಕ್‌ಡ ಅಜ್ಜು ಥಾಂಡಾನ ಲೊಯಿಬಿ ಬಲಿನು ಜಾನ್ವರ್‌ನು ರಾಕ್‌ನಾಬಿ ಮೈಲರ್‌ವಾಳಪರ್ ಛಿಡ್‌ಕಾಡಿ ಶರೀರ್‌ನ ಮೈಲಾನ ಪಾಕ್ ಕರೆಜಾಯ್.

14 ಅಜ್ಜು ಆ ಖ್ವಾಫುಕರಿ ಬೋಲಾನು ರ್ವಯೂತೊ ಹಮೇಶಾನ ಆತ್ಮಡಿ ಇನುಯೋಸ್ ದೇವ್ನ ಕಳಂಕ್‌ಕೊಂತೆ ಬಲಿಹುಯಿನ್ ಸಮರ್ಪಣ್ ಕರಿಲಿದೊಂತೆ ಕ್ರಿಸ್ತನು ಲೊಯಿ ಕೆತ್ರೆಕ್ಕಿ ಅಪ್ಪುನ ಜಾನ್‌ಕೊಂತೆ ಕಾಮಾಡಿ ಛೋಡೈನ್, ಅಪ್ಪೆ ಜಿವೊಜಾನ್ಮೊ ದೇವ್ನ ಆರಾದನೆ ಕರೆಯೇತೆ ತಿಮ್ ಅಪ್ಪೆ ಮನ್ನಿಸಾಕ್ಷಿನ ಪಾಕ್ ಕರೈಕ್ಕೊಯ್ನಿಶು?

15 ಅನಖ್ವಾಜೇಡಿ ದೇವ್‌ಡಿ ಬುಲಾಯೂತೆ ಅದ್ವಿ ದೇವ್ನಿ ವಾಗ್ದಾನ್ ಹುಯಿರ್ಲ್ಲ್ಯೆ ಹಮೇಶಾನು ವಾರ್‌ಖೊ ಲೀಲೆವ್ವುಕರಿ ಕ್ರಿಸ್ತನೆ ಆ ನವ ಒಪ್ಪಂದನ ಮಳಾವವಾಳೊ ಹುಯಿರ್ಲ್ಲ್ಯಾ. ಶನಕತೊ ಪಹಿಲಿ ಒಪ್ಪಂದನ ಹಗಾಮ್ ಕರೈತೆ ಗಲ್ತಿನಖ್ವಾಜೆ ಇವ್ವುನ ಛುಟ್ಕಾರ್ ಕರಾನಖ್ವಾಜೆ ಕ್ರಿಸ್ತ ಮರಣ್ ಲಿದೊ.

16 ಏಕ್ ಮರಣ್ಣಿ ಚಿಟ್ಟಿ ಲೀಖಿರಾಖನು ರ್ವಯೂತೊ ಯೊ ಮರಿರೈಲ್ಯಾ ಸಾಬಿತ್‌ಕರಾನು ಜರೂರತ್ ಛಾ.

17 ಅನಿ ಮತ್ಲಬ್ ಶಾತ್‌ಕತೊ, ಯೊ ಮರೈತೆ ತದೇಸ್ ಯೊ ನಿಯಮ್ ಕಾಮ್ನ ಆವಸ್ ಪಣ್ಣಿ ಲೀಖೊಹುಯೊ ಜಿವೊ ರ್ವವಲಗೂಬಿ ಯೋ ಕಾಮ್ನ ಕೋಆವಾನಿ.

18 ಅಮ್ ರ್ವಾವಪರ್ ಪಹಿಲು ಒಪ್ಪಂದ ಜಿನುಬಿ ಲೊಯಿಕ್ಕೊಂತೆ ಘಟ್ ಭೀರೈಕ್ಕೊಯ್ನಿ.

19 ಮೋಶೆ ಧರ್ಮಶಾಸ್ತ್ರನಿ ಹುಕುಮ್‌ನ ಖ್ವಾರ ಅದ್ಮಿವ್‌ನ ಖ್ವಿಮ್‌ಜಾಡ್ತೊ ಹುಯಿನ್ ತದೆ ಇನೆ ಡಾಂಡನಕೆಲ್ದಾನ ಬೋಕ್‌ಡಾನ ಲ್ಲೋಯಿನ ಪಾಣಿಮ ಮಳೈನ್ ಅಜ್ಜು ಇನ ಧರ್ಮಶಾಸ್ತ್ರ ಲೀಖಿಹುಯು ಪುಂಗ್‌ಳಿನ ಉಪ್ಪರಾಬಿ ಅಖ್ವಾ ಅದ್ಮಿವ್‌ಪರಾಬಿ †ಹಿಸ್ಸೋಪ್‌ನ ಡೀರೆಥೇಬಿ ಲಾಲ್‌ಝಯಿಥೀಬಿ ಭಿಡ್‌ಕ್ಯೊ.

20 ಆ ದೇವ್ವೆ ತುಮಾರಖ್ವಾಜೆ ಹುಕುಮ್ ಕರಿರಾಖ್ಯೊತೆ ಒಪ್ಪಂದಾನು ಲ್ಲೋಯಿ ಆ ಹುಯಿರ್ಲ್ವಸ್ ಕರಿಬೋಲ್ಯೊ.

21 ಇಮ್ಮಸ್ ಡೇರಾಪರಾಬಿ ದೇವ್ವ ಸೇವೆನ ಹೋಣುತೆ ಅಖ್ವಾಸ್ ಜಿನಖ್ವಾಪರಾಬಿ ಅಮ್ಮಿಸ್ ಪರಕ್ಮ ಲ್ಲೋಯಿನ ಭಿಡ್‌ಕ್ಯೊ.

22 ಇಮ್ಮಸ್ ಧರ್ಮಶಾಸ್ತ್ರನಿ ಪರಕ್ಮ ಬೋಲ್ವುಕತೊ ಖ್ವಾರೂಸ್ ರಾಱ್ತು ಲ್ಲೋಯಿಥೀಸ್ ಶುದ್ಧಿಹೋತುಧು. ಅಜ್ಜು ಲ್ಲೋಯಿ ರಂಚಾವಧಿ ಕಾಹೆತೆ ಪಾಪ್ ಕ್ಷಮಾಪಣ್ ಕೊಹೊಯ್ತು.

ಕ್ರಿಸ್ತನು ಬಲಿಥೀಸ್ ಪಾಪ್ ಪರಿಹಾರ್

23 ಇನಾಖ್ವಾಜೆ ಸೊರ್ಗಾನು ಜಿನಖ್ವಾನ್ ಛಾಳಿನಿಫೋಣಿನು ಜಿನಖ್ವಾನ್ ಶುದ್ಧಿಕರಣನಖ್ವಾಜೆ ಅಥಾನು ಬಲಿಖ್ವಾರು ಹೋಣುಕತೊ, ಖ್ವಾಚಮಾಬಿ ಸೊರ್ಗಮ ಶುದ್ಧಿಕರಾನ ಮಹಾನ್ ಬಲಿನು ಜರೂರತ್ ಲ್ಲೆ.

24 ಶನಕತೊ ಕ್ರಿಸ್ತ ಖ್ವಾಚ ಮಂದಿರ್ ಫೋಣಿನಿತರಾನು ಹಾತೇಮ್ಮಿ ಭಾಂದ್ಯಹುಯಿ ಪವಿತ್ರ ಝಗೋಮ ರ್ಲಿಯೊಕೊಂತೆ ಅಪ್ಪಭಣಿಧು ದೇವ್ವಖ್ವಾಪ್ಪೆ ಹಮ್ಮೆ ದೆಖ್ಲಿಲ್ವಾನಖ್ವಾಜೆ ಸೊರ್ಗಮ ಪ್ರವೇಶ್ ಕರಲ್ಯೊ.

25 ಆನಾಹುಯಿನ್ ಮಹಾಯಾಜಕ್ ವರಖ್ವ್ ವರಖ್ವಾನಾಬಿ ಜಾನ್ವರ್‌ನ ಲ್ಲೋಯಿನ ಲೀನ್ ಘಣು ಪರಿಶುದ್ಧ ಝಗೋಮ ಜಾತೋಥೊ. ಕತೋಬಿ ಕ್ರಿಸ್ತ ಇನುಯೋಸ್ ಕೈಯೀಕ್ ವಖ್ವತ್ ಸಮರ್ಪಣ್‌ಕರಾನ ಪರಲೋಕ್‌ಮ ಗಯೊಕೊಯ್ತು.

26 ಇಮ್ ಸಮರ್ಪಣ್ ಕರಾನು ರ್ಲಿಯು ಹೋತ್ಲೊ, ಜಗತ್ ಉಬ್‌ಜಾವಿಧುಬಿ ಕೈಯೀಕ್ ವಖ್ವತ್ ಖ್ವಿತಾಪ್ಪಿಲೇವ್ವು ಪಡ್ಯುಧು.

† 9:19 9:19 ಅಖ್ವುಜಂಗಳ್‌ಮ ಪುಟಾನು ಡೀರು.

ಕತೋಬಿ ಖ್ವಾರನಖ್ವಾಜೆ ಎಕ್ಕ್ಸ್ ಹಲ್ಲ ಜಗ್ಗಮಾನನಿ ಖ್ವರ್ತಿಲಗೂಬಿ, ಯೋ ಪಾಪ್ಪ ಕಾಡಿನಾಖನಿ ಉದ್ದೇಶ್‌ಥಿ ಇನುಯೋಸ್ ಬಲಿದಾನ್ ಹುವಾನ ದೆಖ್ಲೆಲಿದೊ.

27 ಎಕ್ಕ್ಸ್ ವಖ್ವತ್ ಮರಾನುಬಿ ಅಜ್ಜು ಇನಕೇಡೆಥು ದೇವ್‌ಥಿ ತೀರ್ಪ್ ಲೀಲ್ಯಾವಾನು ಹುಯಿರ್ಲ್ಲ್ಯಸ್.

28 ಇಮ್ಮಸ್ ಕ್ರಿಸ್ತ ಜಿನುಬಿ ಕೈಯೆಕ್ತಿ ಅದ್ವಿನು ಪಾಪ್ ಕಾಡಾನಖ್ವಾಜೆ ಎಕ್ಕ್ಸ್ ವಖ್ವತ್ ಸಮರ್ಪಣ್ ಹುಯೊ. ಯೋ ಬೇನೆ ಹಲ್ಲ ದೆಖಾವ್‌ಶೆತೆ ಪಾಪ್ಪ ಕಾಡನ ಕಾಹೆಕತೊ ಕೋಣ್ ಟಿವೈರ್ಲ್ಲ್ಯಸ್ ಇನ ಬಚ್ಚಾನಖ್ವಾಜೆ ಆವ್‌ಶೇತೆ.

10

1 ಧರ್ಮಶಾಸ್ತ್ರ ಅಗಾಡಿ ಆವ್ಣತೆ ಅಲ್ಪಿ ವಾತ್ಸಿ ಲ್ಹಾಯ ಪಣ್ಣಿ ಯೋ ಇನು ಖ್ವಾಚು ರೂಪ್‌ಕಾಹೆ. ಇನಖ್ವಾಜೆ ಯೋ ಧರ್ಮಶಾಸ್ತ್ರ ಹರೇಕ್ ವರಖ್ವ್‌ಕದೇಬಿ ಎಕ್ಕ್ಸ್ ಧರಾನು ಬಲಿನ ಲ್ಲಡೈನ್ ದೇವ್‌ಕನ ಆವಾಳಾನ ಕದೇಬಿ ಭರ್‌ಪೂರ್ ಕರ್ಶೆ ಕೊಯ್ಲಿ.

2 ಅದ್ವಿಖ್ವಾರು ಇವ್ಣು ಆರಾದನೆ ಕರಾಥಿ ಶುದ್ಧಿಕರಣ್ ಹುಯುಹೊತ್ತೊ, ಇವ್ಣಮ ಪಾಪ್ಪಿ ಗಲ್ಲಿನಿ ಖ್ವಿಯಾಲಸ್ ರಕ್ತಿಯುಹೊತ್‌ಕೊಯ್ಲಿ ಅಜ್ಜು ಅಖ್ಪು ಬಲಿದಾನ್ ದೈವಾನು ಭೀರಿಗಯುಹೊತ್.

3 ಹಮೈತೋಬಿ ಯೋ ಬಲೀಥಿ ಹರೇಕ್ ವರಖ್ವ್‌ಬಿ ಪಾಪ್ಪುಯಾದ್ ಹುವಾಸ್.

4 ಶನಕತೊ ಥಾಂಡಾವ್‌ನು ಅಜ್ಜು ಬೋಕ್‌ಡಾವ್‌ನು ಲ್ಲೋಯಿಥಿ ಪಾಪ್ಪ ಪರಿಹಾರ್ ಕರಾನ ಕೊಹೊಯ್ಲಿ.

5 ಇನಖ್ವಾಜೆ ಕ್ರಿಸ್ತ ಜಗತ್ತ್ ಆವಾನಿವಖ್ವ್‌ತೆ ಇನೆ ಅಮ್ ಬೋಲ್ಯೊಕಿ, “ದೇವ್ ತುನ ಬಲಿ ಲ್ಲಡಾವನು ಅಜ್ಜು ಕಾಣ್ಣೆ ದೈವಾನು ಪಸಂದ್ ಕೋಠೂನಿ, ಕತೋಬಿ ಮನ ಏಕ್ ಶರೀರ್‌ನ ತಯಾರ್ ಕರೀನ್ ದೀರಾಖ್ಲೊಸ್.

6 ಜಾನ್ವರ್‌ನ ಬಾಳಧಿಬಿ, ಪಾಪ ಪರಿಹಾರ್ ಪೂರ ಶರೀರ್‌ನು ಬಲಿಧೀಬಿ ತುನ ಖುಷಿ ಹುವಾಕೊಯ್ನಿ.

7 ತದೆ ಮೆ ಹಂದೇಕ್‌ಲ ದೇವ್, ದಪ್ತರ್‌ನಿ ಪುಂಗ್‌ಳಿಮ ಮಾರಿ ಬಾರೇನು ಲೀಖೈರುತೆ ಪರಕ್ತ ತಾರಿ ಖೂಜ್‌ನ ಚಲಾವನಖ್ವಾಜೆ ಐರ್ಟ್ವೊಸ್” ಕರಿ ಮೇ ಬೋಲ್ಯೊ.

8 ಪಹಿಲೆ ಇನೆ ಬೋಲ್ಯೊತೆ ಧರ್ಮಶಾಸ್ತ್ರನಿ ಪರಕ್ತ ಅರ್ಪಣ್ ಹುಯುತೆ ಬಲಿಧೀಬಿ ಜಾನ್ವರ್‌ನ ಬಾಳಧಿಬಿ ಅಜು ಪಾಪ್ ಪರಿಹಾರ್ ಬಲಿಧೀಬಿ ತುನ ಪಸಂದ್ ಕೋಡೊನಿ. ತು ಯೋ ಅಖ್ವಾಮ ಖುಷಿ ಕರಾಕೊಯ್ನಿ.

9 ಅನವಾರ್, “ಹಂದೇಕ್‌ಲ ದೇವ್ ತಾರಿ ಖೂಜ್‌ನ ಚಲಾವನ ಮೇ ಐರ್ಟ್ವೊಸ್!” ಕರಿ ಬೋಲಿರಾಖ್ಯೊಸ್. ಅಮ್ ದೇವ್ ಜೊನು ಬಲಿದಾನ್ ಕಾಡಿನಾಖನಖ್ವಾಜೆ ಕ್ರಿಸ್ತನು ಬಲಿದಾನ್ ಯೊ ಝಗೋಮ ಮ್ವೊಲ್ಯೊ.

10 ಶನಕತೊ ಕ್ರಿಸ್ತಯೇಸು ಎಕ್ವಸ್ ಬಾರ್ ಅಖ್ವಾನಖ್ವಾಜೆ ಇನ ಶರೀರ್‌ನ ಸಮರ್ಪಣ್ ಕರಿನ್ ದೇವ್‌ಖೂಜ್‌ನ ಚಲಾಯೊತೆ ಇನಖ್ವಾಜೆ ಅಪ್ಪೆ ಅಖ್ವಾ ಪಾಪ್‌ಧಿ ಪಾಕ್‌ಹುಯಿಗ.

11 ಹರೇಕ್ ಯಾಜಕ್‌ಬಿ ದನ್‌ಪರೋಜ್ ಚಾಚರ್‌ನು ಸೇವೆಕರ್ತೊಡೊ. ಇಮ್ಮಸ್ ಕೈಯೆಕ್‌ಹಲ್ಲ ಬಲಿದಾನ್ ಕರ್ತೊಡೊ ಕತೋಬಿ ಅನೇಧಿ ಪಾಪ್ ಕಾಡಿನಾಖನ ಕೊಹುಯುನಿ.

12 ಕತೋಬಿ ಕ್ರಿಸ್ತ ಪಾಪ್‌ಖ್ವಾಜೆ ಅಖ್ವಾ ಹಗಾಮ್ ಎಕ್ವಸ್‌ಬಲಿನ ಸಮರ್ಪಣ್‌ಕರಿನ್, ದೇವ್‌ಖಾವಿಬಾಜು ಬೇಶಿಗಯೊ.

13 ತಪ್‌ಥೊ ಇನ ವಹೇರನ್ ಇನ ಗೋಡಾನಿ ರಚ್ಚೊ ಬಣಾವಲಗೂಬಿ ಯೋ ಟಿವೈರ್ಟ್ವೊಸ್.

14 ಇನಿ ಎಕ್ವಸ್ ಬಲಿಧಿ ಪಾಪ್ ಪಾಕ್‌ಕರಿನ್ ಪೂರಕರಿರಾಖ್ಯೊಸ್.

15 ಪವಿತ್ರಾತ್ಮ ಜಿನುಬಿ ಅಪ್ಪುನ ಸಾಕ್ಷಿ ದೈವಾಳೊಹುಯಿನ್, ಪಹಿಲೇಧು ಯೊ ಅಮ್ ಬೋಲಸ್.

16 “ಯೋ ದನ್ ಅವಾದಿನ್ ಮೇ ಇವ್ವಜೋಡ್ ಕರಿಲ್ಯಾವನು ಒಪ್ಪಂದ ಅಮರ್‌ಕ್ಷಿಶೆ, ಮಾರಿ ನಿಯಮ್ಮ ಇವ್ವ ದಿಲ್ಮ ಮ್ಹೇಲಿಶ್ ಇವ್ವ ದಿಮಾಕ್ತಯೋ ಅಖ್ಪಿ ಲೀಖಿಶ್”. ಕರಿ ಪ್ರಭು ಬೋಲಸ್.

17 ಅಜ್ಜು ಯೋ ಅಮ್ ಬೋಲಸ್, “ಇವ್ವ ಪಾಪ್ ಅಖ್ಪಾನಾಬಿ ಅಜ್ಜು ಇವ್ವ ಖರಾಬ್ ಕಾಮ್ನಾಬಿ ಬಿಜ್ಜು ಕದೇಬಿ ಮೇ ಯಾದ್ ಕೋಲೈಶ್‌ನಿ”.

18 ಹಮ್ಗೆ ಪಾಪ್‌ಖ್ವಾರು ಮಾಪ್ ಹುವಾನಬಾದ್ ಪಾಪ್‌ಪರಿಹಾರ್ನ್ ಬಲಿದ್ಯವಾನು ಭರೂರತ್ ಕೊಯ್ನಿ.

ಅಪ್ಪೆ ದೇವ್ನ ಖನ್ನೆ ಅಯ್ಕೆ

19 ಇನಖ್ವಾಜೆ ಭೇನೆ ಭೈಯೇವೊ, ಯೇಸುನ ಲ್ಲೋಯಿಥಿ ಘಣಿ ಪವಿತ್ರರ್ಲುಗೋಮ ಜಾವಾನ ಅಖ್ಪಿ ಛುಟ್ಕಾರ್ ಛಾ.

20 ಅಪ್ಪಖ್ವಾಜೆ ಇನಿ ಶರೀರ್‌ಕರಿ ಬೋಲಾನು ಯೊ ಪಡ್ವಾನ ಮಹಿತೊ ಜಾವನ ನವ ಜಾನ್ನೊ ಮಾರಗ್‌ನ ಕಾಡಿರಾಖ್ವೊಸ್.

21 ಅಜ್ಜು ದೇವ್ನ ಘರ್‌ಪರ್ ಅಧಿಕಾರ್ ರ್ವವಾಳೊ ಮಹಾನ್ ಯಾಜಕ್ ಅಪ್ಪುನ ಛಾ.

22 ಇನಖ್ವಾಜೆ ಖರಾಬ್ ದಿಲ್ವಿಸಾಕ್ಷಿನ ಮ್ಹೆಲ್ಯಹುಯ ದಿಲ್‌ಥೀಬಿ ನೀರ್ಲೊಳ್ ಪಾಣಿಥಿ ಪಾಕ್‌ಹುಯ ಶರೀರ್‌ಥೀಬಿ ಖ್ವಾಚಆತ್ಮಥಿ ಪೂರ ವಿಶ್ವಾಸ್‌ಥಿ ದೇವ್‌ಕನ ಅಯ್ಕೆ.

23 ದಿದೋತೆ ವಾಗ್ವಾನ್ನ್ ಚಲಾವವಾಳೊ ದೇವ್. ಇನಖ್ವಾಜೆ ಅಪ್ಪೆ ವಿಶ್ವಾಸ್‌ನಿ ಬಾರೇಮ ಘಟ್‌ಥಿ ಧರರಾಖಿ.

24 ಅಪ್ಪೆ ಏಕ್‌ಥಿ ಏಕ್ ಪ್ಯಾರ್‌ವತಾಳನ ಖ್ವಾಜೇಬಿ ಅಪ್ಪುಕಾಮ್ ಕರಾನ ಖ್ವಾಜೇಬಿ ಹುಮ್ಮಖ್ವ್ ದೇವ್ವುಕರಿ ಮಾಲುಮ್ ಕರಲಿಯೆ.

25 ಸಬೆ ಮಳಾನು ಆದತ್‌ನ ಥೋಡುಜಣು ಮ್ಹೆಲಿದಿದೂತೆ ತಿಮ್ ಅಪ್ಪೆ ಮ್ಹೇಲಿನಾದೆವ್ವುತೆ, ಅಪ್ಪುನ ಮಾಲುಮ್ ಛಾತೆ ಪರಕ್ ಪ್ರಭು ಆವಾನದನ್ ಖನ್ನೆ ಏಗಾತೆ ಇನಖ್ವಾಜೆ ಬಿಜ್ಜೂಬಿ ಘಣು ಏಕ್‌ಥಿಏಕ್ ಹುಮ್ಮಖ್ವ್ ದಿಯೇ.

26 ಅಪ್ಪೆ ಖ್ವಾಚನ ಅಕ್ಕಲನಿ ಬಾದ್ಮಬಿ ಪಾಪ್ ಕರ್ತನ್ ರ್ವಯಾತೊ ಪಾಪ್ ಪರಿಹಾರ್ ಖ್ವಾಜೆ ಬಿಚ್ಚು ಖಿವೂಬಿ ಬಲಿದ್ಯವಾನು ಕೋಲುಷೇನಿ.

27 ಇನಬದಲ್, ಅಖ್ವೇಥಿ ಡರ್ಥಿ ಭರೈರ್ವ್ತೆ ನ್ಯಾವನು ತೀರ್ಪ್ತನಖ್ವಾಜೆ ಟಿವೈರ್ವ್ತವಾನು ಅಚ್ಚು ದೇವ್ನ ವಹೇರ್ವ್ಯಾವ್ನ ಬಳಾನಿ ಇರಾದನಿ ಝಲ್ಪಟ್ ಖಲಿ ರ್ವಶೆ.

28 ಮೋಶೇನು ಧರ್ಮಶಾಸ್ತ್ರನ ಝಿಟ್ಕಾರ್ವ್ತ ಹುಯಾನ ಬೇಞಣು ನತರ್ ತೀನ್ ಭಣಾನಿ ಸಾಕ್ಷಿನಿ ಆಧಾರ್ಪರ್ ಗೋರ್ಕೊಂತೆ ಮರಣ್ಣಿ ದಂಡನೆ ದೇತೂಡು.

29 ಅಮರ್ವ್ತವಾಪರ್ ದೇವ್ನ ಛಿಯ್ಯಾನ ಮುಂದ್ಲಿನ್, ಇನ ಪಾಕ್‌ಕರಿಲಿದೂತೆ ಒಪ್ಪಂದಾನು ಲ್ಹೆಯಿನ ಅಶುದ್ಧಕರಿ ಜಾಣಿಲೀನ್ ದೇವ್ನಿ ವಾರ್‌ಖ್ವಾನಿ ವರಾನ ಆತ್ಮಾನ ಝಿಟ್ಕಾರವಾಳೊ ಉಶೆ, ಬಿಚ್ಚು ಕೆಥ್ರಾನು ಕರೋರ್ ನಿಶತ್ತ್ ಯೋ ಖ್ವಣೇಡ್ ಹುಯೆಜಾಯ್‌ಕರಿ ತುಮೇಸ್ ಸೋಚಿದೇಖೊ.

30 ಬದಲ್‌ನ ಬದಲ್ ಕಾಡಾನು ಮಾರುಕಾಮ್; ಮೇಸ್ ದೀಶ್‌ಕರಿ ಬೋಲ್ಯೊಹುಯೊ ಅಪ್ಪುನ ಮಾಲುಮ್ ಲ್ಹ. ಶನಕತೊ ಬಿಜೇಕ್ ಹಲ್ಲ ಪುಚ್ಚು ಇನ ಅದ್ವಿನಿ ನ್ಯಾವನು ತೀರ್ಪ್ ಕರ್ಶೆ.

31 ಜಿವ್ತಜಾನ್‌ವಾಳೊ ದೇವ್ನಹಾತ್ಮ ಖ್ವಪ್‌ಡಾನು ಘಣು ಭಯಂಕರ್ ಹುಯಿರ್ವ್ತಸ್.

32 ಅಮ್ ರ್ವವಾಪರ್ ತುಮೆ ಗ್ಯಾನ್ನು ಉಜಾಖ್ವ್ಲೀರಾಖಪರ್ ತದೆ ದೇವ್ನಿ ಉಜಾಖ್ವ್ತುಮಾರಪರ್ ಥು. ರ್ವಯುತೋಬಿ ತುಮೆ ಕೈಯೇಕ್ ವದೆಖ್ವ್ತುಮ ತುಮೆ ಖ್ವಮಾಳ್ಕಾತೆ ದನ್ನ ಯಾದ್ ಕರಿಲೆವೊ;

33 ಥೋಡಿ ವಖ್ವತ್ ತುಮೆ ಚಿಂಗಾಪ್ಪಿನಾಬಿ, ಅಚ್ಚು ಥೋಡಿ ವಖ್ವತ್ ಖ್ವತಾಪ್ಪಿನಾಬಿ ಖ್ವಮಾಳಿನ್ ಚಾವಾಣ್ಯ ಕಡೈಲಿದ. ಅಚ್ಚು ಥೋಡಿ ವಖ್ವತ್ ವದೇಖ್ವ್ ಪಡಾವಾಳನಿ ಜೋಡ್ತ ಮಳಿನ್ ಖ್ವಮಾಳಲಿದ.

34 ತುಮೆ ಜೇಲ್‌ಮ ರ್ವವಾಳನ ಆರ್‌ಗೋರ್ ಒತಾಳ್ಕ. ಅನೇಥಿ ಉಚ್ಚು ಹುಯಿರ್ವ್ತೆ ಹಮೇಶಾನಿ ಆಸ್ತಿ ಛಾಕರಿ ಮಾಲುಮ್ ಕರಿಲಿದ ತುಮಾರಿ ಶೊತ್ತ್ ಛಿನೈಲ್ಯವಾಳಾನ ಶಂತೋಖ್ವ್‌ಥಿ ಮ್ವೇಲಿರಾಖ್ಯಸ್.

35 ಇನಖ್ವಾಜೆ ತುಮಾರಿ ಕಿಮ್ಮತ್ತ್ ನಕೊ ಮ್ವೇಲಿದೆವೊ. ಇನ ಘಣಿ

ಮೋಟಿ ಪ್ರತಿಫಲ್ ಛಾ.

36 ತುಮೆ ದೇವ್ನಿ ಮರ್ಜಿನ ಚಲೈಹುಯಿಗುತೆ ತದೆ ವಾಗ್ಧಾನ್ನ ಲೀಲೇವ್ಣುಕತೊ ತುಮೆ ಖ್ವಮಾಳಿನ್ ರಕ್ಷಿವ್ಣು.

37 ಶನಕತೊ ಪವಿತ್ರಶಾಸ್ತ್ರ ಬೋಲಸ್, “ಆವಾಳೊ ಬಿಜು ಥೋಡ ದನ್ಯಾಸ್ ಆವಾಶೆ ಯೊ ದೇರ್ ಕರ್ತೆಕೊಯ್ನಿ.

38 ಇನಖ್ವಾಜೆ ಮಾರು ನೀತಿವಾಳೊ ವಿಶ್ವಾಸ್‌ಥೀಸ್ ಜಿವಾಶೆ, ಕತೋಬಿ ಇನೇಥಿ ಕೋಣ್‌ತೋಬಿ ಪೀರೆ ಧಕ್ಯೊತೊ ಯೊ ಮನ ಪಸಂದ್ ಕೊರ್ಟಿಶೇನಿ.

39 ಅಪ್ಣೆತೋಬಿ ಪೀರೆ ಹಟವಾಳಹುಯಿನ್ ನಾಶ್‌ಹುವಾಳ ಅದ್ಮಿಕಾಹೆ. ಅನಬದಲ್ ವಿಶ್ವಾಸ್ ಕರಾವಳಹುಯಿನ್ ರಕ್ಷಣೆ ಲೀಲಾವಳ ಹುಯಿರ್ದಾಸ್.

11

ವಿಶ್ವಾಸ್

1 ವಿಶ್ವಾಸ್‌ಕತೊ ಅಪ್ಣೆಸೋಚಿನ್ ಜುಪಿರ್ಟಿಸ್ತೆ ಖ್ವಾರು ಭರೋಖೊಬಿ, ಅಜೂಬಿ ದೆಖಾವಕೊಂತೆ ಜಿನಖ್‌ಪರ್ ಆಧಾರ್ ಹುಯಿರ್ದಿಸ್.

2 ಅಪ್ಣ ಗಲ್‌ಡೆಖ್ವಾರು ಇವ್ಣಿ ವಿಶ್ವಾಸ್‌ಥೀಸ್ ದೇವ್ನಿ ಒಪ್ಪಿಕೆ ಲೀಲಿದು.

3 ಜಗತ್ ದೇವ್ನಿ ವಾತೆಥೀಸ್ ಉಬ್‌ಜು ಕರಿ ಬೋಲಾನು ವಿಶ್ವಾಸ್‌ಥೀಸ್ ಮಾಲುಮ್ ಕರಿರಾಖ್ಯಾಸ್. ಆ ಜಿನಖ್ ದೆಖಾವಸ್ತೆ ಆ ಜಗತ್ ದೆಖಾವಾಥಿ ರ್ದವೊ ನಾ ದೆಖಾವಾಥಿ ರ್ದವೊ ಉಬ್‌ಜುಕರಿ ಬೋಲಾನು ವಿಶ್ವಾಸ್‌ಥೀಸ್ ಪರ್ಪೆಸ್.

4 ವಿಶ್ವಾಸ್‌ಥೀಸ್ ಹೇಬೆಲನೆ ಕಾಯಿನಾನು ಬಲಿಥೀಬಿ ಮಹಾನ್ ಬಲೀನ ದೇವ್ನ ಸಮರ್ಪಣ್ ಕರೈಯೊ ಯೋ ಪರಕ್‌ಥಿ ಯೋ ನ್ಯಾವ್‌ವಾಳೊ ಕರಿ ಸಾಕ್ಷಿಹುಯಿಗೊ. ದೇವ್ನಿ ಇನಿ ಕಾಣ್‌ನ ಸ್ವೀಕಾರ್ ಕರೈಯೊ ಯೋ ಮರಿಗಯೊ ತೋಬಿ ಇನಿ ವಿಶ್ವಾಸ್‌ನಿ ಪರಕ್‌ಥಿ ಬಿಜೂಬಿ ವಾತೆ ಬೋಲವಾಳೊ ಹುಯಿರ್ದಿಸ್.

5 ವಿಶ್ವಾಸ್‌ಧೀಸ್ ಹನೋಕಾನೆ ಮರಣ್ ಲಿದೊ ಕೊಯ್ತೆತೇಸ್ ಪಡೈಗಯೊ. ಶನಕತೊ ದೇವ್ವೆ ಇನ ಬುಲೈಲಿನ್ ಗಯೊತೆಖ್ವಾಜೆ ಯೋ ಕಿನಾಬಿ ದೇಖಾಯೊಕೊಯ್ತೆ. ಯೊ ಪಡಾವನ ಪಹಿಲೆ ದೇವ್ವೆ ಲ್ಹಾಯಕ್ ಕರಾವವಾಳೊ ಕರಿ ಪಹಿಲೇಸ್ ಸಾಕ್ಷಿ ಲೀರಾಖ್ಯೊಸ್.

6 ಕತೋಬಿ ವಿಶ್ವಾಸ್‌ಕೊಂತೆ ದೇವ್ವೆ ಲ್ಹಾಯಕ್ ಕರಾವನ ಕೊಹುವಾನಿ. ಶನಕತೊ ದೇವ್‌ಕನ ಆವಾಳೊ ದೇವ್ ಲ್ಹಾ ಅಜ್ಜು ಇನ ಥೊಂಡವಾಳನ ಪ್ರತಿಫಲ್ ದೇಸ್‌ಕರಿ ವಿಶ್ವಾಸ್‌ಕರ್ಯ್.

7 ವಿಶ್ವಾಸ್‌ಧೀಸ್ ನೋಹಾನೆ ಬಿಜ್ಜೂಬಿ ದೆಖಾವ ಕೊಯ್ತೆತೆ ಇನಿ ಬಾರೇಮ ದೇವ್ವಿ ವಾತೆನ ಲೀನ್ ಡರ್‌ಧೀಬಿ, ಭಕ್ತಿಧಿ ಭರಾವವಾಳೊ ಹುಯಿನ್ ಇನ ಘರ್‌ವಾಳಾನ ಬಚೈಲಾವನಖ್ವಾಜೆ ಜಹಾಜ್‌ನ ಭಾಂಧಿನ್ ತಯಾರ್ ಕರ್ಯೊ. ವಿಶ್ವಾಸ್‌ಧೀಸ್ ಇನೆ ಜಗತ್‌ವಾಳು ನಿಶತ್‌ನ ಲೈವಾಳುಕರಿ ತೀರ್ಮಾನ್ ಕರಿಲಿದೊ. ಇನಖ್ವಾಜೆ ವಿಶ್ವಾಸ್‌ನು ಫಲ್ ಹುಯಿರಯ್ತೆ ನೀತಿನ ಹಕ್‌ದಾರ್ ಹುಯೊ.

8 ವಿಶ್ವಾಸ್‌ಧೀಸ್ ದೇವ್ವೆ ವಾಗ್ದಾನ್ ಕರ್ಯೊತೆ ದೇಖ್ವೊ ಇನೆ ಲೀಲೇವ್ಣುಕರಿ ಅಬ್ರಹಾಮ್‌ನೆ ವಿಧೇಯ ಹುವಾಳೊ ಹುಯಿನ್ ಯೋ ಹಕ್‌ಧಿ ಲೇವ್ಣುಧೂತೆ ದೇಖ್ವೊ ನಿಕ್ಕಿಗಯೊ. ಇನೆ ಕಿಜ್ಜಾ ಜಾವ್ಣುಕರಿ ಸೋಚ್ಚೊ ಕೊಯ್ತೆತೆಬಿ ಚಲೆಗಯೊ.

9 ವಿಶ್ವಾಸ್‌ಧೀಸ್ ಇನೆ ವಾಗ್ದಾನ್ ದೇಖ್ವೊ ಆವಾಖ್‌ತರ್, ಹಿಜ್ಜಾ ಬಿಜ್ಜ ದೇಖ್ವೊವಾಳನಿತರ ಡೇರಾಮ ರ್ಹೀನ್ ಜಿವ್ಣು ಕರ್ಯೊ. ಕಿಮ್ ಇಸಾಕ್ ಅಜ್ಜು ಯಾಕೋಬ್ ಇವ್ಣೆ ಲೀಲಿದಾಕಿ ಯೋಸ್ ವಾಗ್ದಾನ್ ಲೀಲಿದೊ.

10 ಶನಕತೊ ಇನೆ ಹಮೇಶ ಹದಿಪಾಯ ರ್ಹವಾನು ನಂಗರ್ ಕತೊ ದೇವ್ವೆ ಖ್ವಾಜ್‌ಕರೀನ್ ತಯಾರ್ ಕರಿರಾಖ್ಯೊಸ್ತೆ ನಂಗರ್ ಅಬ್ರಹಾಮ್ ಮೋರೆ ದೇಖುಕರ್ತೊ.

11 ಅಬ್ರಹಾಮ್ ಭುಡೊ ಹುಯಿರಯ್ತೊ ಆನಾಹುಯಿನ್ ಸಾರ ವಾಗ್ದಾನ್ ಕರ್ಯೊತೆ ನಂಬ್‌ಣುಕರಿ ಇನಿ ಉಂಬರ್ ಹುಯಿಗುತೋಬಿ ವಿಶ್ವಾಸ್‌ಧೀಸ್ ಬೇಜೂನಿ ಹುವಾನ ಶಕತ್‌ಲಿದಿ.

12 ಇನಖ್ವಾಜೆ ಮರಾನಿ ಉಂಬರಮ ಥೋತೆ ಅಬ್ರಹಾಮ್‌ಧಿ

ಆಕಾಶ್‌ನು ಶುಕ್ರರಾತ್ರಿ ದರಾನ್ ರೇತಿನಿಫೋಣಿಬಿ ಗಣ್ಣಿಕೊಂತೆ ಲಡ್ಡಾ ಹುಯು.

13 ಅವ್ವೆಖ್ವಾರು ವಿಶ್ವಾಸ್‌ರ್ದವಾಳು ಹುಯಿನಸ್ ಮರಿಗಯು. ದೇವ್ನ ವಾಗ್ದಾನ್ ನಾಲಿದೊತೋಬಿ ಯೋ ಅಖ್ವಾನ ದೂರ್‌ಥೀಸ್ ದೇಖಿನ್ ಸ್ವಾಗತ್‌ಕರೀನ್ ಖುಷಿಪಡ್ತು; ಇವ್ವೆ ಇಮೀನ್‌ಪರ್ ಅಲ್ವಾವ್ ದೇಖ್ವಾಳಬಿ, ತಮಾಖ್ವೊದೇಖಾನ ಆಯುಹುಯು ಕರಿ ಮಾನಿಲಿದು.

14 ಅಥಾನಿ ವಾತೆಖ್ವಾರು ಬೋಲಾವಳು ಇವ್ವೆ ಶೊಂತ್ ದೇಖ್ವಾನ ಡಾಂಡವಾಳು ಹುಯಿರುಸ್ ಕರಿ ಬೋಲಾನು ಮಾಲುಮ್ ಪಡಾಸ್.

15 ಇವ್ವೆ ಮ್ವೇಲಿನ್ ಆಯತೆ ದೇಖ್ವಪರ್ ದಿಲ್‌ರಾಖವಳ ರೈಯಹೊತ್ತೊ ಹಿಜ್ಜಾ ಪಾಠುಫರಿ ಭಾವಾನಿಬಿ ಮೋಕಖ್ವಾರು ಇವ್ವುನ ಥು.

16 ಕತೋಬಿ ಇವ್ವೆ ಸೊರ್ಗಕರಿ ಬೋಲಾನ ಮಹಾನ್ ದೇಖ್ವಾನ ಹರಖ್ವಯು. ಇನಖ್ವಾಜೇಧಿ ದೇವ್ವೆ ಇವ್ವೊ ದೇವ್‌ಕರಿ ಬೋಲೈಲುವಾನ ಖ್ವರ್ಮಾಯೊಕೊಂತೆ; ಇವ್ವೆಖ್ವಾಜೆ ನಂಗರ್ ತಯಾರ್ ಕರಿರಾಖ್ವೊಸ್.

17-18 ದೇವ್‌ಧಿ ಅಬ್ರಹಾಮ್ ತರೀಪ್ಪ ಹುವಾನಿ ವಖ್ವೆತೆ ಇಸಾಕನ ವಿಶ್ವಾಸ್‌ಧೀಸ್ ಅರ್ಪಣ್ ಕರೈಯೊ ಯೋ ವಾಗ್ದಾನ್‌ಖ್ವಾರು ಲಿದೋತೆ ಇನೆ ಇಸಾಕಧಿ ಪೈದಹುವವಾಳುಸ್ ತಾರು ಪಿಳ್ಳಿಕರಿ ಬೋಲೈಲಿಷೆಕರಿ ದೇವ್ವೆ ಇನ ಬೋಲಿರಾಖ್ವೊತೋಬಿ ಇನ ಎಕ್ಕ್‌ಸ್ ಥಿಯ್ಯಾನ ಅರ್ಪಣ್ ಕರೈಯೊ.

19 ಅಬ್ರಹಾಮ್‌ನೆ ಮಾರೊ ಥಿಯ್ಯೊ ಮರೈಯೊತೋಬಿ ದೇವ್ ಇನ ಬಚ್ಚಾಡನ ತಾಖತ್‌ವಾಳೊ ಹುಯಿರೈಯೊಸ್ ಕರಿ ಮಾಲುಮ್ ಕರಿರಾಖ್ವೊಥೊ. ಅಜ್ಜು ಇಮ್ವೊಸ್ ಇಸಾಕ್‌ನ ಮರಣ್‌ಥು ಜಿವ್ವೊಹುಯಿನ್ ಆಯೋತೆ ತಿಮ್ ಪಾಠು ಲೀಲಿದೊ.

20 ವಿಶ್ವಾಸ್‌ಧೀಸ್ ಇಸಾಕನೆ ಯಾಕೋಬ್‌ನಾಬಿ ಏಸಾವನ ಆಶೀರ್ವಾದ್ ಕರಾನಿವಖ್ವೆತೆ ಖ್ವಾಮ್ವೆ ಚಾಲ್ತುತೆ ಬಾರೇನಿ ವಾಗ್ದಾನ್ ಬೋಲಿವತಾಳ್ವೊ.

21 ಯಾಕೋಬನೆ ಯೊ ಮರಾನಿ ವಖ್ವೆತಮ ವಿಶ್ವಾಸ್‌ಧೀಸ್

ಯೋಸೇಫನ ಭೇ ಲಡ್ಕಾವನ ಆಶೀರ್ವಾದ್ ಕರಯ್ತೊ. ಹಾತ್ಮಲರಾನ್ಯು ಆಧಾರ್ಲೀನ್ ದೇವ್ನ ಆರಾದನೆ ಕರಯ್ತೊ.

22 ಯೋಸೇಫ ಇನಿ ಮರಣ್ಣಿವಖ್ತಮ್ ಇಸ್ರಾಯೇಲ್‌ವಾಳು ಈಜಿಪ್ಟ್ ದೇಖ್ತೊ ಭಾರ್ನಿಕಾನ್ಯು ಬೋಲಿವತಾಳ್ಕೊತೆ ವಿಶ್ವಾಸ್‌ಧೀಸ್. ಕಾಹೆತೆ ಇನು ಪಿಂಜರ್ದ ಪಾಡಿಲೀನ್ ಜಾವಾನಿ ಬಾರೇಮ ಹುಕುಮ್ ದಿದೊ.

23 ಮೋಶೆ ಪೈದ ಹುವಾಖ್ತರ್ ಹೈರೋತೆನ ಆಯಬಾನೆ ಲಡ್ಕು ಶನ್‌ಗಾರ್ ಲ್ಲಾ ಕರಿ ದೇಖಿನ್ ರಾಜಾನ ಹುಕುಮ್‌ನ ಡರಿನ್ ವಿಶ್ವಾಸ್‌ಧೀಸ್ ಇನ ತೀನ್ ಮಹಿನ ಲಪಾಡಿ ರಾಖ್ತೊ.

24 ವಿಶ್ವಾಸ್‌ಧೀಸ್ ಮೋಶೆ ಶಾಣು ಹುವಾನಪಾರ್ ಫರೋಹನಿ ಫೋರಿನೊ ಛಿಯೊಕರಿ ನಾ ಬೋಲೈಲೇವ್ವುಕರಿ ಖ್ವಯಾಲ್ ಕರಯ್ತೊ.

25 ಥೋಡಿ ವಖ್ತ ಪಾಪ್‌ಭೋಗ್ ಖ್ವಾರಥಿಬಿ ದೇವ್ನ ಅದ್ವಿನ ಜೋಡ್ಡ ವದೇಖ್ ಲ್ಲವಾನುಸ್ ಕೆತ್ರೇಕ್ಕಿ ಅಲ್ಪುಕರಿ ತೀರ್ಮಾನ್ ಕರಿಲಿದೊ.

26 ಈಜಿಪ್ಟ್‌ನು ಅಖ್ವಿ ಧನ್‌ದಾಲತ್‌ಧೀಬಿ ಕ್ರಿಸ್ತನಖ್ವಾಜಿ ಹುವಾಸ್ತೆ ಚಿಂಫಾವ್ಣಿಸ್ ಮೋಟಿ ಭಾಗ್ಯಕರಿ ಮಾನಿಲಿದೊ. ಶನಕತೊ ಖ್ವಾಮೈಆವಾನಿ ಪ್ರತಿಫಲ್‌ಪರ್ ಡೋಳೊ ರಾಖಿಮೈಲ್ಯೊಥೊ.

27 ವಿಶ್ವಾಸ್‌ಧೀಸ್ ಇನೆ ರಾಜಾನ ಇರಾದನ ಡರಯ್ತೊಕೊಂತೆ ಈಜಿಪ್ಟ್ ದೇಖ್ವೊ ಮೈಲಿನ್ ಗಯೊ. ಶನಕತೊ ಇನೆ ದೇಖವಾಳೊ ಕಾಹೆತೆಯಿನ ದೇಖಾನಿಫೋಣಿ ಘಟ್ ದಿಲ್‌ವಾಳೊ ಹುಯೊ.

28 ಪೈಲೋಟ ಲಡ್ಕಾವನ ಸಂಹಾರ್ ಕರಾವಾಳೊ ಧೂತ, ಇಸ್ರಾಯೇಲ್‌ವಾಳನ ಪೈಲೋಟ ಲಡ್ಕಾವನ ನಾ ಛೀಮ್ಣತೆ ಲ್ಲೊಯಿ ಛೀಚ್‌ಕರಿನ್ ಪಸ್ಸು ಚಲಾವನಿತರ ಇನೆ ಕರಯ್ತೊತೆ ವಿಶ್ವಾಸ್‌ಧೀಸ್.

29 ವಿಶ್ವಾಸ್‌ಧೀಸ್ ಇಸ್ರಾಯೇಲ್‌ವಾಳು ಲಾಲ್ ದರಯ್ತೊವ್ವು ಖ್ವುಕ್ಕಿ ಜಮೀನ್‌ಪರ್ ಚಾಲನಿತರ ಉಲಾಂಗ್ತು. ಈಜಿಪ್ಟ್‌ವಾಳು ಇನ ಉಲಾಂಗನ ಕೋಶಿಶ್ ಕರಿನ್ ಡುಬಿಗಯು.

30 ವಿಶ್ವಾಸ್‌ಧೀಸ್ ಇವ್ಣೆ ಖ್ವಾತ್ ದನ್‌ಲಗು ಯಿರಿಕೋ ಖ್ವಯೇರ್ದು ಭೀತ್‌ನ ಫರಾಪರ್ ಯೋ ರಡ್ತಿಗು.

31 ವಿಶ್ವಾಸ್‌ಧೂತೆ ಖ್ವಾಜಿಸ್ ರಾಹಾಬ ಕರಿ ಶೂಳನೆ ಚೋರೇಖ್ತು.

ಖಬರದ್ಯವಾಳೊ ಸಮಾಧಾನ್‌ಧಿ ಮದತ್‌ಕರಿ ರಾಖಿನ್ ಅವಿಶ್ವಾಸಿನ ಜೋಡ್ಡನಾಶ್ ಕೊಹುಯಿನಿತೆ ಬಚಿಗಯ್.

32 ಬಿಜೂಬಿ ಜಾಖ್ತ್ ಶಾತ್ ಬೋಲ್‌ನು? ಗಿದ್ಯೊನ್, ಬಾರಾಕ, ಸಂಸೋನ್, ಯೆಪ್ತಾಹ, ದಾವೀದ, ಸಮುವೇಲ, ಅಜು ಪ್ರವಾದಿಖ್ವಾರನಿ ಬಾರೇಮ ಬೋಲ್ಕುತೊ ಮನ ವಖ್ತ್ ಕೊಪುರಾನಿ.

33 ವಿಶ್ವಾಸ್‌ಧೀಸ್ ಇವ್ಣೆ ರಾಜ್ಯಖ್ವಾರೊಬಿ ಜುತ್ಯು ನ್ಯಾಯನೀತಿಧಿ ಚಲಾಯು, ವಾಗ್ದಾನ್ ಖ್ವಾರೊಬಿ ಲೀಲಿದು, ಶುಂಭಾವ್‌ನ ಮೋಡಾನ ಭಾಂಧ್ಯು.

34 ಆಗ್‌ನಿ ಝಲ್‌ಪಟೇನ ಉಜಾಯು; ತಲ್ವಾರ್‌ನ ಮೋಡೇಮ್ಮಿ ಲ್ಹುಕಿಗಯು; ಲಾಚರ್ ರ್ಹಯುತೋಬಿ, ವಿಶ್ವಾಸ್‌ಧೀಸ್ ಇವ್ಣೆ ತಾಖತ್‌ವಾಳು ಹುಯು, ಜಂಗ್‌ಮ ಮಹಾ ಶಕತ್‌ವಾಳು ಹುಯು, ಅಲಕ್ ದೇಖ್ವೊನು ದಂಡುಡಳವೈನ ನಖ್ವಾಡಿಡಿದು.

35 ತಯೇಡಖ್ವಾರಿನೆ ಮರಿಗಯುಥೂತೆ ಇವ್ಣವಾಳನ ಪಾಲ್ತು ಜಿವ್‌ತೇಧಿ ಲೀಲಿದಿಯೆ. ಥೋಡ ಜಣಾನೆ ಖ್ವತಾಪ್ಪಿ ಪಡಾನಿ ವಖ್ವೆತೆ ಮಹಾನ್ ಮರಣ್‌ಧಿ ಪಾಲ್ತುಜಿವ್ತು ಹುವಾನಿ ಖೂರ್ಜ್‌ಧಿ ಝಟ್ಕಾರ್‌ನ ಝಿಟ್ಕಾರ್.

36 ಬಿಜು ಥೋಡುಜಣು ಚಿಂಫಾವ್ಣಿ ಕೊಲ್ಡೇಮ್ಮಿ ಬೇಡಿ ಘಲೈನ್ ಜೇಲ್‌ಮ ರ್ಹಯು.

37 ಬಿಜು ಥೋಡಜಣಾನ ಅದ್ಮಿಖ್ವಾರು ಬಂಡೊ ಫೇಖಿನ್ ಮಾರ್, ಥೋಡಜಣಾನ ಚರಕ್‌ಧಿ ವ್ವಾಡಿನ್ ಬೇಭಾಗ್ ಕರಿನ್ ಮಾರ್, ಥೋಡಜಣಾನ ತಲ್ವಾರ್‌ಧಿ ಮಾರ್, ಥೋಡುಜಣು, ಖ್ವತಾಪ್ಪಿ ಅಜು ಆ ಖ್ವಾರು ಲ್ಯವಾಳುಹುಯಿನ್, ಬೋಕ್ಸು ಮೇಂಡಾನ ಚಾಂಬ್‌ಡಾವ್ವ ಫೇರವಾಳು ಹುಯಿನ್ ವದೇಖ್ವೊ ಕಾಟ್ಕು.

38 ಅಧ್ರಾನವಾಳಾನ ಆ ಜಗತ್ ಬರಬರ್ರ್ ರ್ಹುಗೊ ಕೊಹುಯಿರ್ಹೂನಿ. ಇವ್ಣೆ ಇವ್ಣ ದೇಖ್ವೊನ ಜಂಗ್‌ಮ, ಪಹಾಡ್, ಘವಿ, ಖಾಡ್‌ಗುಂತಾಮ ಡುಂಡ್ವಾಳವಾಳು ಹುಯಿರ್ಹು.

39 ಅವ್ಣೆಖ್ವಾರು ಇವ್ಣಿ ವಿಶ್ವಾಸ್‌ಧಿ ಅಲ್ಪಿ ಸಾಕ್ಷಿನಲ್ಯಾವಳು

ಹುಯಿರ್ದ್ವಿತೋಬಿ ವಾಗ್ದಾನ್ನ ಫಲ್ನ ಲಿದುಕೊಯ್ನಿ.

40 ಶನಕತೊ ದೇವ್ನೆ ಅಪ್ಪಖ್ವಾಜೆ ಮಹಾನ್ ಖ್ವಾಜ್‌ಧಿ ತಯಾರ್ ಕರೀನ್, ಅಪ್ಪಿ ಜೋಡ್ತ ತಬ್ಬು ವಿಶ್ವಾಸಿಖ್ವಾರು ಭರ್‌ಪೂರ್ ಹೋಣುಕರಿ ನಿರ್ಧಾರ್ ಕರ್ರೊ.

12

ದೇವ್ ಅಪ್ಪೊಬಾ

1 ಆ ಕಾರಣ್‌ಧಿ ಅತ್ತು ಸಾಕ್ಷಿಯೆವ್ನು ಮೋಟು ಝೂಂಡ್ ವಾದ್‌ಳಾನಿ ಘೋಣಿ ಅಪ್ಪ ಅಶ್‌ಪಿಶ್ ಕೋಂಡಿರಾಖಪರ್ ಅಪ್ಪುನ ಅಟ್‌ಖಟ್ ಕರಾಸ್ತೆ ಅಖ್ವಾಸ್ ಭೋಜ್‌ನಾಬಿ, ಶುಲ್ಕಾಧಿ ವಿಲ್‌ಟ್ಕೆಜ್‌ವಾನು ಪಾಪ್ ಜಿನು ಕಾಡಿ‌ನಾಖಿ, ವಿಶ್ವಾಸ್ ಪೈದಕರಾವಳೊಬಿ, ಇನ ಪೂರ ಕರಾವಳೊಬಿ ಹುಯಿರ್ದ್ವಿತೆ ಯೇಸುಪರ್ ನಜರ್ ರಾಖಿನ್ ಅಪ್ಪುನ ನೇಮಕ್ ಹುಯಿರ್ದ್ವಿತೆ ದವಡ್ನ ಖ್ವಮಾಳಿ ಮಿಲ್ತೆಯ್ಲೆ.

2 ಯೇಸು ಇನಖ್ವಾಪ್ಪೆ ಮ್ಹೇಲಿರಾಖ್ತೊತೆ ಖ್ವಶಿನಖ್ವಾಜೆ ಖ್ವರಮ್‌ನಾಬಿ ಖ್ವಾಯ್ ಕರ್ರೊಕೊಂತೆ ಶಿಲ್‌ಬೇನಿ ಮರಣ್ಣ ಖ್ವಮಾಳಿನ್, ದೇವ್ನು ಸಿಂಹಾಸನ್ನ ಖಾವಿಬಾಜುಮ ಬೆರೋಸ್.

3 ತುಮೆ ದಿಲ್‌ಹೇಟು ನಾ ಕರಾವಾಳ ಹುಯಿನ್ ಬೇಜಾರ್ ನಾಖಾವ್ಣೆತೆ ಯೇಸುನಿ ಬಾರೇಮ ಸೋಚಿದೇಖೊ. ಯೊ ಪಾಪಿಯೇವ್ ಖ್ವಾರಾಧಿ ಕೆತ್ತೇಕ್ಕಿ ವಿರೋದ್ನ ಖ್ವಮಾಳಿಲಿದೊ.

4 ತುಮೆ ಪಾಪ್ ವಿರೋದ್ನ ಲಡಾಮ ಲ್ಹೋಯಿನ ರಂಚಾಯೆತ್ರೆ ಲಡ್ತಾಕೊಯ್ನಿ.

5 ಲಡ್ತಾವ್‌ನ ಬೋಲಾನಿತರ ತುಮುನ ಬೋಲಿನ್ ಹುಮ್ಮಖ್ವಾನ್ವಿ ವಾತೆವ್‌ನ ಭೈಕಿಗಯಕಿಶು? ಯೊ ಶಾತ್‌ಕತೊ ಮಾರ ಛಿಯ್ಯಾ ಪ್ರಭುನಿ ನಿಶತ್ ಝಿಟ್ಕಾರ್ ನಕೊ. ಯೊ ತುನ ಗುರ್‌ಕಾವನಿ ವಖ್ವೆತೆ ಬೇಜಾರ್ ನಕೊಕರ್.

6 ಶನಕತೊ ಪ್ರಭು ಕಿನಕಿನ ಪ್ಯಾರ್ ಕರಾಸ್ಕಿ ಇವ್ವುನ ನಿಶತ್ ದೇಸ್. ಇನೊ ಛಿಯ್ಯಾನಿಫೋಣಿ ಸ್ವೀಕಾರ್ ಕರಸ್ತೆ ಹರೇಕ್‌ನಾಬಿ ದಾಬುಕ್ ದೇಸ್‌ಕರಿ ಲ್ಲಾ.

7 ತುಮೆ ಅಲ್ಫಿನಿತರ ರ್ಹವಾನ ಖ್ವಾಜೆಸ್ ನಿಶತ್ತ್ ಖ್ವಮಾಳಿ ರ್ಹವೊ. ದೇವ್ ತುಮುನ ಲಡ್ಕಾಕರಿ ಚಲಾವಸ್. ಶನಕತೊ ಬಾಧಿ ಮಾರ್ ಕೊಖಾಯ್ತೆ ಛಿಯ್ಯೊ ಕಿಞ್ಲಾ ಲ್ಲಾ?

8 ಅಖ್ವಾಸ್‌ಞ್ಣನ ಹೋಣುತೆ ನಿಶತ್‌ಮ ಭಾಗ್‌ಲ್ಯವಾಳ ನಾಹುಯತೊ ತುಮೆ ವ್ಯಬಿಚಾರ್‌ಧಿ ಪೈದಾಹುಯ ಪಣ್ಣಿ ಇನ ಲಡ್ಕಾಹೆ.

9 ಆಸ್ ಕಾಹೆತೆ ಅಪ್ಪುನ ದಾಬುಕ್ ದಿದಾತೆ ಲೋಕಾನ ಆಯಬಾನ ಅಪ್ಪೆ ಮರ್ಯಾದಿ ದಿಯ್ಲೆಸ್ಕಿ. ಇಮ್ಮಸ್ ಅಪ್ಪ ಆತ್ಮವ್‌ನ ಬಾ ಹುಯಿರ್ದವಾಳನ ಅಪ್ಪೆ ಬಿಞ್ಲಾಬಿ ಞಾಖ್ತ್ ಅಧೀನ್‌ಹುಯಿನ್ ಬಚಿನಾರ್‌ಲೆವ್ವುಕಿಶು?

10 ಅಪ್ಪ ಲೋಕಾನು ಬಾಯಿವ್ಣೆ ಇವ್ವ ದಿಲ್ಮ ಬರಬರ್ ದೆಖಾವಸ್ತೆ ಇಮ್ ಥೋಡ ದನ್ ಅಪ್ಪುನ ದಾಬುಕ್ ದಿದು. ಕತೋಬಿ ದೇವ್ಣೆ ಇನಿ ಪರಿಶುದ್‌ಮ ಅಪ್ಪೆ ಭಾಗ್‌ವಾಳ ಹುಯಿರ್ದೆವ್ವುಕರಿ ಅಪ್ಪ ಅಲ್ಲಾನ ಖ್ವಾಜೆಸ್ ದಾಬುಕ್ ದೇಸ್.

11 ಖಿವು ನಿಶತ್‌ಬಿ ಯೊ ವಖ್ತ್‌ಮ ಖ್ವುಶಿಧಿ ದೆಖಾವಕೊಂತೆ ದುಖ್‌ನಿಫೋಣಿಸ್ ದೆಖಾವಸ್. ಕತೋಬಿ ಅಲ್ಫಿನಿತರ ರ್ಹವಾನ ರುಡಿರಾಖವಳು, ಖ್ವಾಪ್ಪೆ ಸಮಾಧಾನ್ ರ್ಹವಾನು ನ್ಯಾಯನು ಫಲ್ಮ ಲೇಸ್.

ಯೇತಾವ್ಣಿ ಅಞ್ಣು ಖ್ವಾಜ್

12 ಇನಖ್ವಾಜೆ ಝೂಟ ಪಡಿಞ್ಣಾವನ ಹಾತ್ತ್ ಕಾಪಾಸ್ತೆ ಗುಡ್‌ಫೈವ್‌ನ ತಾಖತ್ ಕರ್ಲೆವೊ.

13 ತುಮೆ ಚಾಲಾನಿ ವಾಟ್ನ ಖ್ವತ್ತ್ಡ್ ಕರಿಲೆವೊ. ತದೆ ಲಂಗ್ಡಾವ್ಣೊ ಗೋಡೊ ಮಚ್ಚೆಕೊಂತೆ ಅಞ್ಣುಲುಷೆ.

14 ಅಖ್ಬಾನಿ ಜೋಡ್ಡ ಸಮಾಧಾನ್‌ಧೀಬಿ ಜಿವ್ವುಕ್ಕರಾನ ಅಙ್ಗು ಸಮಾಧಾನ್‌ಧಿ ರ್ವವಾನ ಕೋಶಿಶ್ ಕರೊ. ಪರಿಶುದ್ಧಕೊಂತೆ ಕೋಣ್‌ಬಿ ಪ್ರಭುನ ದೇಖಾನ ಕೊಹೊಯ್ನಿ.

15 ತುಮಾರಮ ಕೋಣ್‌ಬಿ ದೇವ್ನಿ ವಾರ್‌ಖ್ವೇಧಿ ಛುಕಿನ್ ನಾಜಾವ್ವತ್ತೇಬಿ, ಖಿವು ಕಡಿಹುಯಿರೀತೆ ಜ್ಞಡ್ ಕುಡಿಪಾಡಿನ್ ಅಸಮಧಾನ್ ಕರೀನ್ ಕೈಏಕ್ ಜ್ಞಾನ ಮೈಲು ನಾಕರ್‌ವ್ತೆ ದೇವಿಲೆವೊ.

16 ಖಿವು ಪಾಪೇಲು ರ್ವವೊ, ಕೋಣ್‌ಬಿ ಏಸಾವನಿತರಾನೊ ಲೋಕ್‌ವಾಳನಿತರ ರ್ವವೊ ಧರಮ್‌ಮೀರಿನ್ ಘಾಲವಾಳು ತುಮಾರಮ ನಾರ್‌ವ್ವತ್ತೆ ಜ್ಞತನ್‌ಧಿ ರ್ವವೊ. ಯೊ ಏಸಾವನೆ ಏಕ್ ವಖ್ತನ್ ಖಾಣಾನಖ್ವಾಜೆ ಇನಿ ಪೈಲ್ವೊಟಾನಿ ಹಕ್ಕ ವೇಚಿನಾಖ್ವೊ.

17 ಯೊ ಹುವಾದಿನ್ ಇನಿ ಬಾನಿ ಆಶೀರ್ವಾದ್ ಲೇವ್ವುಕ್ಕರಿ ಡೋಳಾನು ಆಂಯ್ಲು ನಾಕ್ತೊಹುಯಿನ್ ಬಿಂತಿಕರ್‌ವೊತೊಬಿ, ಇನೆ ಕರ್‌ವೊತೆ ಇನ ಬದ್ಲಾವನ ಇನ ಕೊಹುಯುನಿ.

18 ತುಮೆ ಇಸ್ರಾಯೇಲ್‌ವಾಳನಿತರ ಆಯಾತೆ ತಿಮ್ ಹಿಜ್ಜಾ ಆಗ್ ಲಾಗುಕರ್ತುಫ್. ವಾದ್‌ಳಾನ ಮಬ್‌ಧಿ ಅಂಧಾರಧಿಬಿ ಮಹಿಚ್ಚೊಪಿ ರಾಧಿ ಕೋಂಡೈರ್‌ವೊ. ಮೂಚಿರಾಖ್ವುಫ್ ಅಪಟ್‌ರ್ಪಟ್‌ನೊ ವಹಿರೊಲ್ಲಾತೆ ಪಹಾಡ್‌ಕನ ಆಯುಕೊಯ್ನಿ.

19 ತುತ್ಪೂರಿನು ಅವಾಙ್ ವಾತೆನಿ ಅವಾಙ್‌ಕನ ಕರಿ ಕಾಹೆ ಆಯಿರ್‌ವೊತೆ. ಯೊ ಅವಾಙ್ ಇವ್ವಿಜೋಡ್ ಬೋಲನುಸ್ ನಕೊಕರಿ ಗಿಂಗೈಲಿದು.

20 ಶನಕತೊ ಆ ಪಹಾಡ್‌ನ ಛೀಮಾವಾಳು ಕೋಣ್ಬಿರ್‌ವೊ ಖಿವು “ಜಾನ್ವರ್‌ಬಿ ರ್ವವೊ ಇನ ಬಂಡೊ ಫೇಕಿನ್ ಮಾರಿನಾಕ್ಲು” ಕರಿ ನಿಯಮ್ಮ ಇವ್ವೆ ಖ್ವಮಾಳ್ಳು ಕೊಯ್ನಿ.

21 ಅತ್ರೇಸ್ ಕಾಹೆತೆ ಅನ ದೇಖಾನು ಜಾಖ್ವತ್ ಭಯಂಕರ್‌ಧೂತೆ ಖ್ವಾಜೆ ಮೋಶೇನೆ ಮೇ ಡರಿನ್ ಕಾಪುಕರೂಸ್ ಕರಿ ಬೋಲ್ವೊ.

22 ಕತೊಬಿ ತುಮೆ ಚೀಯೋನ್ ಪರ್ಭತ್‌ಕನ ಅಙ್ಗು ಜಿವ್ವಜಾನ್ನ್

ದೇವನು ನಂಗರ್ ಹುಯಿರುತೆ ಸೋರ್ಗಾನ ಯೆರೂಸಲೇಮನ, ಜತ್ತಾಮ
ಭರೈರುತೆ ಲಾಖೋಲಾಕ್ ದೇವ್ ದೂತರ್‌ಕನಾಬಿ,

23 ಪರ್‌ಲೋಕ್‌ಮ ನಾಮ್ ಲೀಖೈರಾಖ್ಯಾಹುಯ ಪಹಿಲೋಟಿ
ಲಡ್ಕಾನಿ ಸಬೇನಾಬಿ, ಅಖ್ಬಾನ ನ್ಯಾವ್‌ಣೊ ಹುಯಿರೋತೆ ದೇವ್‌ಕನಾಬಿ
ಪೂರ ಹುಯಿರೋತೆ ನೀತಿವಾಳಾನ ಆತ್ಮಕನಾಬಿ ಐರ್‌ಲ್ವಾಸ್.

24 ನವ ಒಪ್ಪಂದಾನ ಇಫ್‌ಮ ರ್‌ವಾಳೊ ಯೇಸುಕನಬಿ
ಹೇಬೆಲನ ಲ್ಹೋಯಿಥೀಬಿ ಮಹಾನ್ ವಾತೆ ಬೋಲಾಸ್ತೆ ಛಿಡ್‌ಕಾಯುತೆ
ಲ್ಹೋಯಿಕನಾಬಿ ಐರ್‌ಲ್ವಾಸ್.

25 ವಾತೆ ಬೋಲುಕರಾತೆಯಿನ ಝಿಟ್ಕಾರ್‌ನ್ಹಿನಾತೆ ತಿಮ್
ದೇಖಿಲೆವೊ ಶನಕತೊ ಜಮೀನ್‌ಪರ್ ದೇವ್ನಿ ವಚನ್
ಬೋಲ್ಕುಹುಯಾನ ಝಿಟ್ಕಾರವಾಳು ನಿಶತ್ತ್ ಛುಕಿಜಾವನ
ನಾಹುಯುಕತೊ, ಸೋರ್ಗಾಧು ವಾತೆ ಬೋಲಾವಳನ ಮ್ಹೇಲಿನ್
ಅಷ್ಟೆ ದೂರ್ ಗಯಾತೊ ನಿಶತ್ತ್ ಕಿಮ್ ಛುಕ್‌ಶು?

26 ಇನು ಅವಾಜ್ ತದೆ ಜಮೀನ್ ಹಲಾಯು. ಹಮ್ಗೆ ತೋಬಿ
ಯೊ ಬಿಜು ಎಕ್ಕ್‌ಸ್ ಹಲ್ಲ ಮೇ ಖಲಿ ಜಮೀನ್ ಕಾಹೆತೆ ಆಬ್‌ಮಾಬಿ
ಕಪಾಡುಸ್‌ಕರಿ ವಾಗ್ಗಾನ್ ಬೋಲಿರಾಖ್ಲೊಸ್.

27 ಬಿಜು ಎಕ್ಕ್‌ಸ್‌ಹಲ್ಲ ಕರಿ ಆ ವಾತ್ತ್ ಸೋಚ್ಕುತೊ ಬಚ್ಚಾಡಾನು
ಜಿನಖ್‌ಖ್ವಾರು ಉಬ್‌ಜೈರ್‌ಲ್ಹೊಸ್ತೆ ಖ್ವಾಜೇಥಿ ಕಡೈನಖೈಜಾಶೆಕರಿ
ಬೋಲಾನು ದೆಖಾವಸ್. ತದೆ ಬಚ್ಚಾಡಕೊಂತೆ ಛಾತೆ ಜಿನಖ್‌ಖ್ವಾರು
ಘಟ್‌ಥಿ ಭೀರೈಷೆ.

28 ಇನಖ್ವಾಜೆ ಕೋಣ್ ಖರ್ಕಾವನ ಕೊಹುವಾನಿತೆ ರಾಜ್ಯನ
ಲೀಲಾವವಾಳ ಹುಯಿರ್‌ಲ್ಹೊತೆ ಅಷ್ಟೆ ಧನ್ಯವಾದ್ ಕರಾವಾಳ ಹುಯಿನ್
ದೇವ್ ಬರಬರೈ ಆರಾದನೆಬಿ ಭಕ್ತಿಥೀಬಿ ಅಜು ಡರ್‌ಥೀಬಿ ಕರಿಯೆ.

29 ಶನಕತೊ “ಅಪ್ಪೊ ದೇವ್ ಭುಂಜಾವತೆ ಆಗ್ ಹುಯಿರ್‌ಲ್ಹೊಸ್”.

13

ದೇವ್ವ ಲ್ಲಾಯಕ್ ಕರಾವನು ಕಿಮ್

1 ಕೆದೇಬಿ ವಿಶ್ವಾಸಿ ಬೈಯೇ ಭೇನೆವ್‌ನ ಪ್ಯಾರ್ ವತಾಳೊ.

2 ಮ್ಹೇಮಾನ್ನ್ ಉಪ್‌ಚಾರ್ ಕರಾಮ ಝಿಟ್ಕಾರೊ ನಕೊ. ಶನಕತೊ ಯೊ ಕರಾಮ ಥೋಡುಜ್ಜಣು ಮಾಲುಮ್‌ಕೊಂತೆ ದೇವ್ವ ದೂತರ್‌ನಾಬಿ ಉಪ್‌ಚಾರ್ ಕರುಕರಸ್.

3 ಜೇಲ್‌ಮ ರ್‌ವಾಳನ ಜೋಡ್ತುಮೇಬಿ ಜೇಲ್ ಜೋಡ್ತರ್‌ವಾಳ ಕರಿ ಮಾಲುಮ್ ಕರೀನ್ ಇವ್ನ್ ಶರೀರ್‌ನ ಹುಯೂತೆ ಖ್ವಿತ್ತಾಪ್ಪಿ ತುಮುನಾಬಿ ಹುಯುಕರಿ ಲಹಿನ್ ಇವ್ವುನ ಖ್ವಿಯಾಲ್ ಕರಿಲೆವೊ.

4 ಅಖ್ವಿಜ್ಜಣು ವ್ಯಹಾನ ಮರ್ಯಾದಿನುಕರಿ ಗಣ್ಣಿಕರನ್ ಅಜ್ಜು ಬಾವಣ್ ಬಾವ್ರಿ ಏಕ್‌ಥಿಏಕ್ ವಿಶ್ವಾಸ್ತ ರ್‌ವೇವ್ವು ಶನಕತೊ ಪಾಪೇಲವ್ವಬಿ ಅಜ್ಜು ವ್ಯಬಿಚಾರಿಯೇವ್ವಾಬಿ ದೇವ್ ನ್ಯಾವ್‌ಫೇಡಾವ್‌ಷೆ.

5 ಪೈಶಾನಿಪ್ಯಾರ್‌ಥಿ ದೂರ್ ರ್‌ವೊ ತುಮುನ ಛಾತೆ ಇನಾಮ ಹಕ್ಲಾಲ್ ಕರೊ. “ಮೆ ತುಮುನ ಕೆದೇಬಿ ಹಾತ್ ಕೊಮ್ವೇಲಿಶ್‌ನಿ. ಕೆದೇಬಿ ದೂರ್ ಕರೀಶ್ ಕೊಯ್ನ್” ಕರಿ ದೇವ್‌ಸ್ ಬೋಲಿರಾಖ್ವೊಸ್.

6 ಇನಖ್ವಾಜೆ ಪ್ರಭು ಮನ ಮದತ್ ಕರಾವಾಳೊ ಮೇ ಡರಿಶ್ ಕೊಯ್ನ್. ಅದ್ವಿಮನ ಶಾತ್ ಕರಾನ ಉಷೆ? ಕರಿ ಹಮೆ ಭಾಲಿಥಿ ಬೋಲಿಲಿಶು.

7 ತುನ ಕೋಣ್ ದೇವ್ನಿ ವಚನ್ನ್ ಭೋದನ್ ಕರಸ್ಕಿ ಯೊ ತುಮಾರ ಸಬೆನ ಮೋಟಾವ್ನ್ ಖ್ವಿಯಾಲ್ ಕರಿಲೆವೊ. ಅಜ್ಜು ಜಿವ್ವನ ಖ್ವಿರ್ತಿಲಗು ಖಿವಿ ಪರಕ್ ಭಾಲಿಲಿದುಕರಿ ಖ್ವಿಯಾಲ್ ಕರೀನ್ ಇವ್ನ್ ವಿಶ್ವಾಸ್ ಪಾಡಿಚಾಲೊ.

8 ಕ್ರಿಸ್ತ ಯೇಸು ಗಯೋತೆ ದನ್ನೆ ಕಿಮ್‌ಥೋಕಿ ಹಮ್ವೆಬಿ, ಕದೆಕದೇಬಿ, ಎಕ್ಸ್‌ಥರ ರ್‌ವಾಳೊ.

9 ಹರೇಕ್ ಧರಾನು ಅಲಕ್ ಅಲಕ್ ಭಣಾನಿ ವಾತ್ತ್ ಖ್ವಿಪ್‌ಡಿನಾಭಾವ್ಣುತೆ ಬರಬರನ್ ವಾಟ್ಚಿಚಾಲೊ. ಶನಕತೊ ದೇವ್ನಿ ವಾರ್‌ಖ್ವೇಥಿ ದಿಲ್ನ್ ಘಟ್ ಕರಿಲ್ಯಾವನು ಅಲ್ಪು. ಖಾಣಾನಿ ಜಿನಖ್ವೊನಿ ಬಾರೇನು ನಿಯಮ್‌ಖ್ವಾರು ಪಾಡಿ ಚಾಲವಾಳಥಿ ಶನು ಫಾಯಿದೊಬಿ

ಕೊಡುವಾನಿ.

10 ಯಹೂದಿ ಯಾಜಕ್ ಸೇವೆ ಕರಾನ ಡೇರಾಮ ಚಾಕ್ರಿ ಕರವಾಳನ ಚಾಚ್ಕರ್‌ನ ಜಿನಖ್ವೆನ ಖಾವಾನು ಹಕ್ ಕೊಯ್ವಿ.

11 ಮಹಾಯಾಜಕ್ ದೋಷ್ ಪರಿಹಾರ್ ಕರಾಸ್ತೆ ಬಲೀನ ಜಾನ್ವರ್‌ನ ಲೋಯಿನ ಪಾಡಿಲಿನ್ ಪವಿತ್ರಝಗೋನ ಮಹಿ ಜಾಸ್. ಕತೋಬಿ ಯೋ ಜಾನ್ವರ್‌ನು ಶರೀರ್‌ಖ್ವಾರು ಟಾಂಡಾನ ಭಾರ್ ಬಾಳಿನಾಖಸ್ತಿ.

12 ಇನಖ್ವಾಜೆ ಯೇಸುಬಿ ಜಿನು ಶೊಂತ್ ಲೋಯಿಧಿ ಇನ ಅದ್ವಿಯೇವ್‌ನ ಪಾಕ್ ಕರಾನಖ್ವಾಜೆ ಖ್ವಯೇರ್ ಭಾರ್ ಮರೈಯ್.

13 ಇಮ್ಮಸ್ ಟಾಂಡಾನ ಭಾರ್ ಕಾಡಿನ್, ಖ್ವರಮ್ ಕಾಡ್ಯತೆ ಇನಾಮ ಅಪ್ಪೇಬಿ ಭಾಗ್‌ಲ್ಯವಾಳ ಹುಯಿರೈಯೆ.

14 ಶನಕತೊ ಆ ಜಗತ್‌ಮ ಹರ್‌ಹಮೇಶಾನು ಖ್ವಯೇರ್ ಅಪ್ಪುನ ಕೊಯ್ವಿ. ಆವ್‌ಶೇತೆ ನಂಗರ್‌ಮ್ಲೋರೆ ದೇಕ್ಟೆ ಟೆವೈರ್.

15 ಇನಖ್ವಾಜೆ ಯೇಸುಧೀಸ್ ಧನ್ಯವಾದ್‌ನಿ ಬಲೀನ ದೇವ್ವ ಲಗತ್ತರಸ್ ಸಮರ್ಪಣ್ ಕರಿಯೆ. ಇನ ಅಪ್ಪೆ ಪ್ರಭುಕರಿ ನಾಮ್ವ ನಂಬಿನ್ ಮೋಡೇಖ್ವು ಹರ್‌ಕೆ ಕರಿಯೆತೆಸ್ ಅಪ್ಪೆ ಅರ್ಪಣ್ ಕರಾನು ಬಲಿಹುಯಿರೈಯೆ.

16 ಆ ನಾಹುಯಿನ್ ಬಿಜೇಕ್‌ನ ಮಳಿನ್ ಅಛ್ಫುಕರಾನ ನಾ ಬೈಕ್‌ಣುತೆ ಮದತ್ ಕರೊ, ಆ ಅಖ್ವು ದೇವ್ವ ಲ್ಲಾಯಕ್ ಹುವಾನು ಬಲಿಖ್ವಾರು.

17 ತುಮಾರು ಸಬೆನ ಮೋಟಾವ್ನಿ ವಾತೆನ ಖ್ವಮ್‌ಭೊ, ಇವ್ವ ದಾಬುಕ್ ರ್ಲವೊ. ಇವ್ವೆ ಗಣ್ತಿ ದೇವ್ವುತೆ ಖ್ವಾಜೇಧಿ ತುಮಾರ ಆತ್ಮವ್‌ನ ಕಾವ್ನಿ ಕರಾವಾಳ ಹುಯಿರೈಯೆ. ಇವ್ವೆ ದುಖ್ ನಾಕರ್‌ಮ್ಲೆ ಖ್ವಿತ್ತಿಧಿ ಅನ ಕರಾನಿಘೋಣಿ ಚಾಲಿಲೆವೊ. ಶನಕತೊ ಇವ್ವೆ ದಿಲ್ ದುಖ್‌ಕರೀನ್ ಕರಾನಿ ಸೇವೇಧಿ ತುಮುನ ಫಾಯಿದೊ ಹುವಾನುಕಾಹೆ.

18 ಹಮಾರ ಖ್ವಾಜೆ ಪ್ರಾರ್ಥನೆ ಕರೊ. ಅಪ್ಪೆ ಹರೇಕ್ ವಿಚಾರ್‌ಮ ಅಛ್ಫು ಹುಯಿನ್ ಚಾಲಿಲೇವ್ವುಕರಿ ಸೋಚಿಯೆ. ಶನಕತೊ ಹಮೆ ಅಖ್ವಿವೇಳ್ ದಿಲ್ವಿಸಾಕ್ಷಿನ ಲೀರಾಖ್ವಾಕರಿ ಮಾನಿರಾಖ್ವಾಸ್.

19 ಅಜ್ಜು ಮೇ ಘಣಿ ಜಲ್ಲೀಮ ತುಮಾರಕನ ಪಾಠು ಆವಾನಿತರ

ತುಮೆ ಪ್ರಾರ್ಥನೆ ಕರ್ನುಕರಿ ಮೇ ತುಮುನ ಜಾಖ್ವತ್ ಗಿಂಗೈಲೆವುಸ್.

ಖ್ವರ್ತಿನಿ ಪ್ರಾರ್ಥನೆ

20 ಸಮಾಧಾನೋ ದೇವ್, ಅಪ್ಪೊ ಪ್ರಭು ಯೇಸುನ ಹಮೇಶಾನ ಒಪ್ಪಂದಾನ ಲೋಯಿಥಿ ಮರ್ಯಮಾಧು ಉತಾಡ್ಲೊ ಯೊ ಮೇಂಡಾನ ಮಂಧಾನ ಚಲಾವವಾಳೊ ಮಹಾ ಪಾಳಂದಾರ್ ಹುಯಿರೊಸ್.

21 ತುಮೆ ಇನಿ ಮರ್ಜಿನ ಚಲಾವನಿತರ ಹರೇಕ್ ಅಲ್ಪಿ ಫಣೈಮಾಬಿ ಭರ್ಪೂರ್ ಕರಾದೆ, ಯೊ ಅಪ್ಪ ಬೀಚ್ಚಿ ಯೇಸು ಕ್ರಿಸ್ತಧಿ ಇನ ನಜರ್ಮ ಪಸಂದ್ ಹುವಾನಿತರ ಕಾಮ್ ಕರಸ್ ಇನ ಜಗ್ಗೊಮಾನಮಾಬಿ ಮಹಿಮೆ ಹುವಾದೆ! ಇಮ್ಮಸ್ ಹುವಾದೆ. ಆಮೆನ್.

ಖ್ವರ್ತಿನು ವಚನ್ಖಾರು

22 ಬೈಯೇ ಭೇನೇವೊ ಆ ಅಕ್ಕಲ್‌ನಿ ವಾತೇನ ಖ್ವಮಾಳಿ ರ್ವೇವ್ವುಕರಿ ಹುಮ್ಮಖ್ ದೈವಾನ ತುಮುನ ಗಿಂಗೈಲೆವುಕರುಸ್. ಶನಕತೊ ತುಮುನ ಲೀಖಾಯುತೆ ಆ ಚಿಟ್ಟಿ ಘಣು ಕೊಯ್ನಿ.

23 ಅಪ್ಪೊ ಬೈಹುಯಿರೊತ್ತೆ ತಿಮೊಥೆನಾಬಿ ಜೇಲ್‌ಮಾಧು ಭುಟ್ಟಾರ್ ಹುಯುಕರಿ ತುಮುನ ಮಾಲುಮ್ ರ್ವಾವಾದೆ. ಯೋ ಒಗ್ಗಿಮ ಆಯೋತೊ ಮೇ ಇನಜೋಡೆ ಏನ್ ತುಮುನ ದೇಖಿಶ್.

24 ತುಮಾರ ಅಖ್ವಾಸ್ ಸಬೇನಿ ಮೋಟಾವ್ವ ಅಜ್ಜು ಪವಿತ್ರ ದೇವ್ವ ಅದ್ವಿವಾನಾಬಿ ಖ್ವಲಾಮ್ ಬೋಲೊ. ಇಟಲಿ ದೇಖ್ವಾನು ಬೇನೆ ಬೈಯೇಬಿ ಇವ್ವೇಬಿ ತುಮುನ ಖ್ವಲಾಮ್ ಬೋಲಸ್.

25 ದೇವ್ವ ವಾರ್ಖೊ ತುಮಾರ ಅಖ್ವಾನಿ ಜೋಡ್ ರ್ವಾವಾದೆ. ಆಮೆನ್.

ದೇವ್ವಿ ಖಾಜಿ ವಚನ್
The New Testament in the Vaagri Booli language of
India: ದೇವ್ವಿ ಖಾಜಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವ್ವಿ ಖಾಜಿ ವಚನ್
ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06